



**ԶՕՐԱՎԱՐ ԹՈՎՄԱՍ
ՆԱԶԱՐԲԵԿԵԱՆԻ ԱՆՏԻՊ
ՅՈՒՇԵՐԸ ԱՌԱՋԻՆ
ՀԱՄԱՇԽԱՐՀԱՅԻՆ
ՊԱՏԵՐԱԶՄԻ ՌՈՒՍ-
ԹՈՒՐՔԱԿԱՆ (ԿՈՎԿԱՍԵԱՆ)
ՌԱԶՄԱՃԱԿԱՏԻ ՄԱՐՏԱԿԱՆ
ԳՈՐԾՈՂՈՒԹԻՒՆՆԵՐԻ ՄԱՍԻՆ
(1914 ՅՈՒԼԻՍ-1916 ԱՊՐԻԼ)**

ՌՈՒԲԷՆ ՍԱՀԱԿԵԱՆ
rubensahakyan58@gmail.com

ՄՈՒՏՔ

Զօրավար-տեղակալ Թովմաս Յովհաննէսի Նազարբեկեանը (Ֆոմա Իան Նազարբեկով, 1855-1931'), այն հազուադէպ զինուորականներից է, որ մասնակցել է միջանի պատերազմների՝ 1877-78ի ռուս-թուրքական, 1904-05ի ռուս-ճապոնական, 1914-17՝ Ա. Համաշխարհային Պատերազմի ռուս-թուրքական ռազմաճակատի, 1918 Փետրուար-Յունիսի հայ-թուրքական, 1918 Դեկտեմբերին հայ-վրացական, 1918-20ի հայ-ադրբեջանական ընդհարումներին, 1920ի հայ-թուրքական մարտական գործողություններին:

Առաւել յայտնի է Նազարբեկեանի ռազմական գործունէութեան 1917-1920 շրջանը, ուստի մենք նպատակայարմար գտանք անդրադառնալու զօրավարի մարտական գործողութիւնների այն շրջանի լուսաբանմանը, որն ընդգրկում է 1914 Յուլիսից մինչեւ 1916 Ապրիլը, հիմնականում յենուելով Նազարբեկեանի ռուսերէն չիրապարակուած յուշերի վրայ, որոնք պահպանում են Հայաստանի Ազգային Արխիւում (ՀԱԱ) զօրավարի անձնական ֆոնդում: Յուշերը գրուած են ձեռագիր, թանաքով, աշակերտական տետրերում, որոնք 10ից անելի են: Բացի այդ, Նազարբեկեանի անձնական ֆոնդում պահպանուել են ռուսերէն լեզուով հրամաններ, կարգադրութիւններ, նամակներ եւ այլ կարգի գրութիւններ, որոնք վերաբերում են 1904-1905ի ռուս-ճապոնական պատերազմի եւ 1914-1917ի ռուս-թուրքական ռազմաճակատում

մղուած մարտական գործողութիւններին: Թարգմանութիւնները կատարել ենք մենք:

Կեանքի վերջին տարիները Նազարբեկեանը անց է կացրել Թիֆլիսում նիւթական անասելի ծանր պայմաններում: Զօրավարը ծանր հիւանդ էր, որն արդիւնք էր 1921ի ձերբակալութեան³: 1928 Յունուարի 16ին նա պաշտօնապէս դիմում է իշխանութիւններին, խնդրելով իրեն ճանաչել աշխատանքային հաշմանդամ եւ նշանակել թոշակ⁴: Թիֆլիսի խորհրդային իշխանութիւնները հրաժարուել էին զօրավարին զինուորական թոշակ նշանակել, պատճառաբանելով թէ նա պատերազմի ժամանակ չի վիրաւորուել:

Յուլերի շարադրման ժամանակ Նազարբեկեանին զգալի օգնութիւն է ցոյց տալիս Իւան Ենիկոլպովը (Ենիկոլպեան, 1888-1890): 1920ականներին Ենիկոլպովը հանդիսանում էր Վրաստանում խորհրդային Հայաստանի Արխիւային Վարչութեան ներկայացուցիչը եւ հնարաւորութեան դէպքում զօրավարին տրամադրել է արխիւային փաստաթղթեր:

Նազարբեկեանի յուշերը գրուել են 1928-1929ին: Նա օգտագործել է ոչ միայն իր մօտ պահպանուած փաստաթղթերը, որոնց մի մասը նրա ձերբակալուելուց յետոյ կորել էին, այլեւ նամակագրական կապ է ունեցել իր մարտական ընկերների՝ զօրավարներ Յովհաննէս Հախվերդեանի⁵ եւ Մովսէս Սիլիկեանի (Մոխսէյ Սիլիկով)⁶ հետ, որոնք իրենց հերթին օգնել են Նազարբեկեանին ճշտել այս կամ այն գործողութեան մանրամասները, լրացրել փաստերով այս կամ այն դէպքերն ու իրադարձութիւնները:

Կարելի է ենթադրել, որ զօրավարը նախաձեռնելով մարտական գործողութիւնների պատմութեան շարադրումը՝ նպատակ ունէր ոչ միայն իր նիւթական դրութիւնը բարելաւել, այլեւ ճշմարտացի ներկայացնել Ա. Համաշխարհային Պատերազմի ռուս-թուրքական ռազմաճակատում ընթացած մարտական գործողութիւնների պատմութիւնը, որը խորհրդային իշխանութիւնների կողմից 1920ականներից արդէն սկսել էր արժանանալ ոչ-անաչառ գնահատականի: Որքան զարմանալի է՝ նոյնիսկ մեր օրերում Նազարբեկեանի անցած մարտական ուղին ճիշտ չի լուսաբանուում, օգտագործում են նախկինում եղած, մի շարք դէպքերում ոչ-անաչառ, փաստաթղթեր, որպէսզի անուանարկեն զօրավարին⁷:

1914-1918՝ Նազարբեկեանն ականատես է արեւմտահայութեան Յեղասպանութեանը: Նրա հրամանով կատարուել են թուրք-քրդական գազանութիւնների հետեւանքների լուսանկարներ, ենթակայ սպաները ներկայացրել են զեկուցագրեր հայերի զանգուածային ջարդերի ու տեղահանութեան մասին: Զօրավարն իր յուշերում յիշատակում է առանձին քուրդ եւ թուրք անհատների կողմից հայերին փրկելու դէպքեր, որոնք եզակի էին:

1914-1916՝ մղուած մարտական գործողութիւնների ընթացքում զօրավարը բազմիցս առնչուել է հայ կամաւորական խմբերի եւ նրանց հրամանատարների հետ: Նա յատկապէս առանձնացնում է Դրոյի կամաւորական խումբը, որին զօրավար Սիլիկեանը խորհրդային տարիներին գրած նամակում հետեւեալ գնահատականն է տուել՝ «Դրոյի դրութիւնան՝ դա փառահեղ դրութիւն է, Հայաստանի հպարտութիւնն ու գեղեցկութիւնն է»⁸:

Նազարբեկեանի հրամանատարութեան ներքոյ կռուել է Անդրանիկի Հայկական Ա Կամաւորական Խումբը: Զօրավարը այն եզակի հրամանատարներից էր, որի հեղինակութիւնը ընդունում էր Անդրանիկը:

Իր յուշերում զօրավարը անհիմն է համարում հայ կամաւորների հասցէին եղած ամբաստանութիւնները: Նա հերքում է փոխարքայ Ն. Ռոմանովի ժամանակ տարածուող կեղծ տեղեկութիւնները⁹ իբր հայերը իրականացրել են մահմեդականների զանգուածային կոտորածներ¹⁰:

Նազարբեկեանը բարձր է գնահատում ռուսական բանակի մարտունակութիւնը եւ եթէ որոշ դէպքերում քննադական խօսքեր է ասում մարտական գործողութիւնների ծրագրաւորման մասին եւ բարձրագոյն հրամանատարութեան հասցէին, ապա դրանք երբեւիցէ նպատակ չեն ունեցել վարկաբեկել կամ անուանարկել բանակը եւ հրամանատարութեանը: Զօրավարն աշխատել է անաչառ դիրքերից դիտել ու մեկնաբանել այս կամ այն գործողութիւնը եւ տուել է իր կարծիքը այս կամ այն որոշման մասին: Միաժամանակ չի թաքցրել իր հրճուանքը եւ հպարտութիւնը, երբ ներկայացրել է Կովկասեան Բանակի մղած այս կամ այն մարտական գործողութիւնը կամ ճակատամարտը:

Մեզ չյաջողուեց ՀԱԱում գտնել նրա յուշերի շարունակութիւնը, որոնք ընդգրկում են մինչեւ 1917 Հոկտեմբեր ընկած ժամանակա-

հատուածը: Նազարբեկեանի յուշերի միւս մասը, որն ընդգրկում է 1917 Հոկտեմբերից մինչեւ 1918 Ապրիլ, հրատարակուել են¹¹:

1907ին Նազարբեկեանը պաշտօնաթող է լինում: Պատճառն այն էր, որ բարձրագոյն հրամանատարութիւնը հրաժարուել էր նրան շնորհել զօրավար-հազարապետի զինուորական կոչում եւ համաձայնուել էր այն շնորհել եթէ Նազարբեկեանը պաշտօնաթող լինի: Եւ Նազարբեկեանը, իրեն վիրաւորուած զգալով, նախընտրում է պաշտօնաթող լինել ու ստանալ այդ կոչումը:

Ցաւօք իր յուշերում զօրավարը չի գրում, թէ 1907-Յուլիս 1914 ժամանակահատուածը ինչով է զբաղուել: Նա իր յուշերի հիմնական մասը սկսում է շարադրել 1914 Յունիսի 28ից յետոյ, երբ Սարաւետյում տեղի է ունենում աստրիական գահաժառանգ Ֆրանց Ֆերդինանդի սպանութիւնը¹²: Մարտական պատրաստականութեան է բերում նաեւ Կովկասեան Ռազմական Օկրուգը (ԿՌՕ): Կովկասից ռուս-աստրիական ռազմաճակատ են տեղափոխուում առկայ ուժերի երկու երրորդը¹³: Օսմանեան յարձակման դէպքում փոխարքայութիւնը գտնուելու էր վտանգաւոր վիճակում: Նազարբեկեանը սխալ է համարում այդ ուժերի տեղափոխումը Կովկասից, քանի որ բանակներում կային մեծ թուով սպաներ, որոնք մասնակցել էին 1877-1878 ռուս-թուրքական պատերազմին եւ լաւ գիտէին մարտական գործողութիւնների շրջանը¹⁴: Ռուս-աստրիական ռազմաճակատ է տեղափոխուում նաեւ Արմաւիրում կազմաւորուած եւ ԿՌՕ ուղարկելու համար նախապատրաստուած Կովկասեան Հեծելազօրային Դիւիզիան¹⁵:

ԶՕՐԱՎԱՐ ՆՊԱԶԱՐԲԵԿԵԱՆԻ ՅՈՒՇԵՐԸ

1914 Սեպտեմբերի սկզբներին ռուս-թուրքական սահմանի անմիջական հարեանութեամբ սկսում են յայտնուել թուրքական հետախուզական հեծելապարեկախմբեր: Գերմանացի եւ թուրք սպաները բացայայտ կատարում են տեղանքի քարտէզագրում: Իսկ Սեպտեմբերի 15ին եւ 23ին Կարսի Մարզի շրջանում տեղի են ունենում զինուած բախումներ ռուսական սահմանն անցած թուրք եւ ռուս զինուորների միջեւ¹⁶:

1914 Հոկտեմբերի 16ի լոյս 17ի գիշերը գերմանա-թուրքական ռազմանաւերը հրետակոծեցին ռուսական սեւծովեան Սեւաստոպոլ, Նովոռոսիյսկ եւ Թէոդոսիա քաղաքները: Հակառակորդին

յաջողուեց ջրասոյգ անել ռուսական միքանի ռազմական եւ առեւտրական նաւեր ու վնասել ափամերձ մի շարք շինութիւններ: Ի պատասխան այդ ծովահենային յարձակման, 1914 Հոկտեմբերի 20ին Ռուսաստանը, ապա Մեծն Բրիտանիան եւ Ֆրանսիան պատերազմ յայտարարեցին Օսմանեան Կայսրութեանը:

Սկսած Յուլիսի 18ից Նազարբեկեանը բազմիցս դիմումներ էր կատարել Կովկասեան Բանակի շտաբ, խնդրելով իրեն ընդունել ծառայութեան: Սակայն շտաբի բարձրաստիճան սպաներից՝ զօրավար Բորիս Վսեյովզորովը անընդհատ յետաձգում էր, խուսափում էր որեւէ յստակ պատասխան տալ, տարբեր պատճառաբանութիւններ կատարելով:

Հոկտեմբերի սկզբին Նազարբեկեանին է դիմում 66րդ Հետեակային Դիւիզիայի շտաբի պետ, գնդապետ, յետագայում զօրավար Եւգենի Լեբեդինսկին, յայտնելով, որ իրենց մօտ ազատ է զօրաբաժնի հրամանատարի պաշտօնը եւ խորհուրդ է տալիս դիմել Կովկասեան Բանակի շտաբ եւ խնդրել իրեն նշանակել այդ պաշտօնին: Սակայն Վսեյովզորովը մերժում է, պատճառաբանելով, որ այդ պաշտօնն զբաղեցուած է:

Երկար սպասելուց եւ անընդհատ անորոշ պատասխաններ ստանալուց յետոյ Նազարբեկեանը որոշում է անմիջականօրէն դիմել Կովկասեան Բանակի շտաբի պետ, զօրավար Նիկոլայ Եուդենիչին: Վերջինս առաջարկում է անմիջապէս զեկուցագիր գրել եւ ներկայացնել իրեն: Եուդենիչը անմիջապէս Նազարբեկեանին նշանակում է 66րդ Դիւիզիայի հրամանատարի տեղակալ: Հոկտեմբերի 16ին զօրավարին տեղեկացնում են, որ ստացուել է նոր հրաման՝ նրան նշանակել են Կովկասեան Բ. Հրաձգային Բրիգադի հրամանատար: Զօրամասը գործելու էր Հիւսիսային Պարսկաստանում տեղակայուած «Ադրբեջանական»¹⁷ Ջոկատի՝ Կովկասեան Դ. Հեծելազօրային Դիւիզիայի կազմում, որի հրամանատարն էր զօրավար Ֆէոդոր Չեռնոզուբովը: 1914 Հոկտեմբերի վերջերին Նազարբեկեանը ժամանում է Խոյ, որտեղ տեղակայուած էին զօրագնդի զօրամասերը:

Նազարբեկեանը յուշերում յիշատակում է իր զրոյցները հայ հասարակական նշանատու գործիչներից մէկի՝ Յակոբ Զարիեանի (Եակով Զարիեւ) հետ: Զօրավարը յաճախ է անդրադառնում այդ գործին, նրա գործունէութեանը եւ զգացում է այն յար-

գանքը, որ նա տաճում էր Զարիեանի նկատմամբ¹⁸: Վերջինս, զօրավարի հետ ունեցած զրոյցում յայտնում է, որ ՀՅ Դաշնակցութիւնը բազմիցս զգուշացրել էր ռուսական հրամանատարութեանը, որ Օսմանեան Կայսրութիւնը նախապատրաստում է յարձակուելու Ռուսաստանի վրայ, սակայն ԿՌՕի ղեկավարութիւնը անուշադրութեան է մատնում այդ կարեւոր տեղեկութիւնը: Հրամանատարութիւնը համոզուած էր, որ օսմանեան Թուրքիան պատերազմի մէջ կը մտնի միայն 1915ի գարնան: Այդ էին վկայում ռուսական հետախուզական տուեալները, որոնց ԿՌՕի հրամանատարութիւնն աւելի շատ էր վստահում¹⁹:

Իր յուշերում զօրավարը անդրադարձել է հայ կամաւորական խմբերի կազմատրմանը եւ նրա հրամանատարներից միջանիսին: Նազարբեկեանը նրանց որակում է որպէս «սիրուած ժողովրդական հերոսներ»²⁰: Նա նշում է, որ ռուսական հրամանատարութիւնը սկզբնապէս թոյլատրում է ձեւաւորել չորս խումբ²¹: Զօրավարը թուարկում է չորս խմբերի հրամանատարներին²²:

Նազարբեկեանը հարկ է համարում ընդգծել այն փաստը, որ 1914ի ամռանը էրզրումում (Կարին) ՀՅԴի ղեկավարները հրաժարուել են երիտթուրքերի առաջարկութիւնից՝ Կովկասում խռովութիւններ բարձրացնել եւ օժանդակել թուրքական զօրքին²³:

1914ի Նոյեմբերին Հիսիսային Պարսկաստանում Ադրբեջանական Զոկատը զգալի յաջողութիւնների է հասնում: Դա հարկադրում է քրդական ցեղերին ուղիներ որոնել ռուսական հրամանատարութեան հետ համաձայնութեան գալու եւ դիմադրութիւնը դադարեցնելու համար:

Զօրավար Չեռնոզուբովը Նազարբեկեանին, որպէս «օգնութիւն» ուղարկում 50 հեծեալ քրդերի: Զօրավարը բացասաբար է վերյիշում այդ խմբի մասին, որոնք «ոչ մի օգուտ չտուեցին», քանի որ զբաղում էին բացառապէս կողոպուտով²⁴:

1914 Նոյեմբերի 15ին Նազարբեկեանի առաջապահ ուժերը գրաւում են Կոթուր գիւղաքաղաքը: Նա հետաքրքիր տեղեկութիւն է հաղորդում տեղի բնակչութեան մասին: Պարզում է, որ Կոթուրի բնակչութիւնը մահմեդականութիւն ընդունած հայեր էին²⁵:

Զօրավար Չեռնոզուբովը Նազարբեկեանի միջոցով առաջարկում է Անդրանիկին իր խմբով շարժուել Վան, խոստանալով նրան տալ նաեւ երկու լեռնային թնդանօթ²⁶: Իրավիճակը, սա-

կայն, կտրուկ փոխուեց, քանի որ Սարիղամիշ Քաղաքի շրջանում սկսուել էին ծանր մարտեր, իսկ Պարսկաստանում հակառակորդն աշխուժացրել էր գործողութիւնները:

Ար Կարծիքով ջոկատի հրամանատարի առաջարկը բաւականին վտանգաւոր էր, քանի որ յայտնի չէր թէ ինչպէս էր իրականացուելու խմբի մատակարարումը, ինչ ուժեր ունէր հակառակորդը եւն.: Այս եւ այլ պատճառներ հաշուի առնելով էր, որ զօրավար Նազարբեկեանը որոշեց թոյլ չտալ կամաւորներին շարժուել Վան²⁷: Անդրանիկի ունեցած հետախուզական տեղեկութիւնների համաձայն հակառակորդն ունէր շուրջ երեսուն հազար զինուոր եւ 4 թնդանօթ²⁸:

Ստեղծուած իրավիճակում Նազարբեկեանը որոշում է նահանջել: 1914 Դեկտեմբերի 1ին տրուում է նահանջի հրամանը: Ա. խմբին յանձնարարուում է պաշտպանել զօրագնդի գումակը: Ռուսական զօրքի հետ միասին հարկադրուած էր հեռանալ հայ եւ ասորի բնակչութիւնը: Նահանջի ընթացքում զօրավարը միքանի անգամ հարկադրուած էր դիմել հակագրոհների, որպէսզի զսպի կրկակոխ հետետող հակառակորդին: Մարտերում միքանի անգամ անջի են ընկնում հայ կամաւորները:

Դեկտեմբերի 5ին ռուսական զօրքը նահանջում է Բաշկալէից: Տեղի կայազօրի հրամանատարը հարկ չէր համարել քաղաքը շրջապատող բարձունքներում պահակակէտեր նշանակել, որից եւ օգտուում է հակառակորդը եւ անսպասելի յարձակումով ստիպում ռուսական ուժերին հապշտապ նահանջել:

1914 Դեկտեմբերի 20ին ստացուում է զօրավար Չեռնոզուբովի հրամանը՝ պատրաստ լինել շարունակելու նահանջել: Նազարբեկեանն այդ մասին յայտնում է Զաւրիեանին, որին այդ լուրը խորապէս վշտացնում է: Զօրավարը սկսում է սփոփել եւ յուսադրել, որ ամէն ինչ դեռ վերջացած չէ: Նա հետեւեալն է պատասխանում. «Ինչպէս չտխրի, երբ որ իր ողջ կեանքը նուիրել է հայ ժողովրդի ազատագրութեանը եւ այժմ ամէն ինչ փուլ է գալիս այն պատճառով, որ Կովկասեան ղեկավարութիւնը անուշադրութեան մատնեց իր տեղեկութիւնները հակառակորդի մեծաքանակ ուժերի մասին»²⁹: Ի բարեբախտութիւն, շուտով ստացուում է ուրախալի նորութիւն՝ Սարիղամիշի շրջանում օսմանեան Գ. բանակը պարտութիւն է կրել: Այս լուրին հետեւում է անհեթեթ հրաման՝

շարունակել նահաջը դեպի Խոյ: Այս արդէն տարօրինակ որոշում էր: Թշնամին ջախջախուած է, որեւէ վտանգ չկայ: Սակայն կատարում է անհասկանալին՝ փոխանակ վերականգնելու կորցրած դիրքերը, հրաման է տրուում շարունակել նահանջը:

Դեկտեմբերի 23ին Նազարբեկեանն իր զօրագնդով սկսում է նահանջել: Ա. խմբին հրամայում է իրականացնել հայ եւ ասորի բնակչութեան պաշտպանութիւնը: Զօրավարը նկարագրում է այն սարսափելի տանջանքները, որոնց ենթարկւում էր հայ եւ ասորի բնակչութիւնը: Նրա խոստովանութեամբ, զինուորականներից շատերը չէին կարողանում զսպել իրենց արցունքները, ականատես լինելով մինչեւ գօտկատեղը հասնող ցեխաջրի միջով անցնող կանանց ու երեխաներին³⁰: Զինուորականները եւ կազակները հնարաւորինս օժանդակում էին փախստականներին: Դեկտեմբերի 26ին զօրագնդի զօրամասերը հասնում են Խոյ, որտեղ հրաման է ստացւում նահաջել Ջուլֆա: Կրկին տարօրինակ եւ անհեթեթ հրաման: Դեկտեմբերի 27ին Նազարբեկեանի մօտ է գալիս Զաւրիեանը եւ խնդրում որեւէ կերպ հասնել նրան, որպէսզի նահանջի հրամանը կասեցուի: Սակայն ապարդիւն: Այդ ժամանակ Նազարբեկեանի խորհրդով Զաւրիեանը հեռագրում է Կովկասի փոխարքայ եւ բանակի գլխաւոր հրամանատար Ի. Վորոնցով-Դաշկովին, որին ճանաչում էր անձնապէս եւ փոխարքան իսկոյն կասեցնում է նահանջը³¹:

1915ի Փետրուարի կէսերին զօրավար Չեռնոզուբովը³² որոշում է վճռական գործողութիւնների դիմել Հիւսիսային Պարսկաստանում: Փետրուարի 18ին սկսում են աշխուժ մարտական գործողութիւնները: Մարտերում կրկին աջքի է ընկնում Ա. Խումբը: Սպաներից շատերին հիացրել էին հայ մարտիկների հմուտ գործողութիւնները³³: Ապա որոշ ժամանակ պարսկական ռազմաճակատում հաստատւում է յարաբերական դադար:

Նազարբեկեանը յիշատակում է 1915 Ապրիլի 7ին Վանում սկսուած հայերի ինքնապաշտնական մարտերի մասին: Նա մանրամասն ներկայացնում է հայերի դիմադրութեան պատճառները, ընդգծելով, որ հիմնական պատճառը՝ օսմանեան իշխանութիւնների վարած հայաջինջ քաղաքականութիւնն էր:

Այս շրջանում Նազարբեկեանի վարած կոիւններից ամենանշանաւորը Դիվանի ճակատամարտն էր: Օսմանեան հրամանատա-

րուբինը, որն ուներ լրտեսական լայն ցանց ինչպես Հիսիսային Պարսկաստանում, այնպես էլ Ադրբեջանական Ջոկատում, կարողացել էր պարզել, որ Դիման թաղաքում եւ շրջակայքում ռուսները չունեն բաւարար քանակութեամբ զօրք, ուստի որոշում է նախաձեռնել յարձակում: Յարձակումը նպատակ ուներ Դիմանի շրջանում ջախջախել ռուսներին, ապա յարձակուել Երեւանի ուղղութեամբ եւ տիրել Բաքուի նախային շրջաններին, միաժամանակ ոտքի հանել Կովկասի մահմեդականներին: Այդ նպատակով, 1915 Մարտին Վանի Նահանգից Պարսկաստան ուղղուեց Խալիլ բէյի հրամանատարութեան տակ գտնուող Հաւաքական Յրդ Դիլիզիան:

Խալիլի նպատակն էր Դիմանի մօտ ռուսներին ջախջախելուց յետոյ շարժուել Ջուլֆա, ապա համալրել զօրաբաժինը տեղի մահմեդականներով, ներխուժել Զանգեզուր-Նարաբադ, Ելիզաւետպոլի ու Բաքուի նահանգները: Իսկ ռազմաքաղաքական բարենպաստ պայմանների դէպքում Խալիլը արշաւելու էր Դաղստան եւ Կովկասի մահմեդական ապստամբ բնակչութեան օգնութեամբ անջատել երկրամասը Ռուսաստանից³⁴:

Զօրավար Չեռնոզուբովը Ապրիլի 16ին Դիմանի շրջան է ուղարկում Կովկասեան Բ. Հրաձգային Բրիգադը Զօրավար Նազարբեկեանի հրամանատարութեամբ³⁵: Նրա հրամանատարութեան ներքոյ կար ութ գումարտակ, 12 հարիրեակ եւ 12 թնդանօթ: Բ. Բրիգադի դէմ գործում էր Խալիլի 10-12 գումարտակ, 12 թնդանօթ եւ մօտ 6 հազար քրդեր³⁶:

1915 Ապրիլի 15ի լոյս 16ի գիշերը հակառակորդն անցաւ յարձակման եւ գրաւեց Դիմանը: Կովկասեան Բ. Հրաձգային Բրիգադի զօրամասերը յայտնուեցին դժուարին կացութեան մէջ, քանի որ դեռեւս ոչ բոլոր ուժերն էին տեղ հասել: Զօրավար Նազարբեկեանը յուշագրում է. «Այդ ծանր ըրպէին ես նկատեցի առաջացող ոչ-մեծ զօրամաս: Պարզուեց, որ դա հայկական դրուժինայի վաշտն էր Սումբատի (Սմբատ Բորոյեան - Ռ.Ս.) գլխատարութեամբ, որը մէկ օր առաջ ուղարկուել է Կարաթեփէի Լեռնանցքը հետախուզութեան...»³⁷: Նազարբեկեանի հրամանով կամաւորներ դիրքեր գրաւեցին Մուխանջիկ գիւղից հարաւ-արեւելք՝ դիմագրաւելու պաշտպանութեան ծախ թելի օղակման փորձ կատարող թշնամուն՝ թոյլ չտալով նրան անցնել թիկունքը: Զօրա-

վարը գիտակցելով, որ ճակատամարտի յաջողութիւնը կախուած է հայ ռազմիկների արիութիւնից, հրամայեց Սմբատին «մեռնել, բայց չնահանջե»³⁸:

Հայերի զբաղեցրած դիրքերը Դիմանի բանալին էին: Հակառակորդի խիտ զօրաշարքերը յարձակում էին հայկական վաշտի զբաղեցրած պաշտպանական տեղամասի վրայ: Նազարբեկեանի վկայութեամբ. «Դրութիւնիկները ստիպուած էին միքանի անգամ ձեռնամարտի բռնուել հակառակորդի հետ: Սումբատի ուժականութեան եւ անվեհերութեան շնորհիւ, հակառակորդի բոլոր սրընթաց յարձակումներն ապարդիւն անցան եւ դրանից յետոյ հակառակորդը դադարեցրեց յարձակումը եւ նահանջեց»³⁹:

Զօրավար Նազարբեկեանն ըստ արժանւոյն է գնահատում իր զօրամասի դիրքերը գրոհող թուրք զինուորների մարտական պատրաստականութիւնը եւ քաջութիւնը: Հակառակորդն անընդիստ գրոհում էր խիտ զօրաշարքերով, ձգտելով ճակատային գրոհը զուգակցել ռուսների ձախ թելի օղակումով: Այն նպատակ ունէր զօրամասը կտրել Խոյից՝ իր մատակարարման եւ հաղորդակցութեան միակ ուղիւ⁴⁰:

Իրավիճակը սրում էր նաեւ այն պատճառով, որ Խոյի հետ կապող միակ ճանապարհով փախչում էին հազարաւոր հայ եւ ասորի փախստականներ: Դա նաեւ բացասաբար էր ազդում զօրքի բարոյահոգեբանական վիճակի վրայ:

Ապրիլի 17ի առաւօտեան ժամանեցին լրացուցիչ ստորաբաժանումներ, այդ թւում՝ Հայկական Ա Խմբի միւս վաշտերը Անդրանիկի հրամանատարութեամբ: Այդ օրը հակառակորդը բաւարարում է միայն ռուսական դիրքերի հրետակոծութեամբ եւ աշխուժ գործողութիւնների չի դիմում:

Նազարբեկեանի գնահատմամբ, չնայած որ Խալիլ Բէլը, շնորհիւ իր լրտեսական ցանցի, ամենայն մանրամասնութեամբ տեղեակ էր իր թուային եւ կրակային առաւելութեան մասին, այնուամենայնիւ չէր կարող հասնել յաջողութեան, քանի որ կորցրել էր յարմար պահը՝ մէկ օրով ուշացնելով յարձակումը: Խալիլն այդ հնարաւորութիւնն ունէր Ապրիլի 16ին, երբ Բ. Հրաձգային Բիգադի զօրամասերը նահանջում էին, չկար պահեստագօր, իսկ նման դէպքում «աղէտն անխուսափելի կը լինէր»⁴¹: Այդ էր պատճառը, որ Խալիլն անընդիստ գրոհում էր,

ձգտելով օգտագործել իր թուային գերակշռությունը: Նա հաշուի չէր առել ռուս հետեւակային զինուորների, կազակների եւ հայ կամավորների քաջությունն ու արիությունը, որոնք չնայած բարդ պայմաններին կարողացան հարկադրել Խալիլին մէկ օրով յետաձգել գլխաւոր յարձակումը: Յատկապէս աչքի են ընկնում ռուս հրետանաւորները, որոնք դիպուկ կրակով կարողանում են լռեցնել հակառակորդի թնդանօթները:

Ապրիլի 18ի վաղ առաւօտեան ժամը 4ին հակառակորդն անցաւ յարձակման: Թուրքական գրոհի գլխաւոր հարուածն ուղղուած էր ռուսական պաշտպանութեան կենտրոնին եւ ձախ թեփն: Կենտրոնի պաշտպանութեան ողջ ծանրութիւնն ընկած էր Հայկական Ա. Խմբի վրայ: Անդրանիկն անձամբ շրջում էր կամավորների դիրքերը, քաջալերում մարտիկներին «յիշեցնելով անոնց պարտականութիւնները»⁴²:

Անյաջողութեան մատնուելով կենտրոնում, թուրքերը հարուածն ուղղում են հակառակորդի աջ թեփն, ձգտելով անցնել ռուսների թիկունքը: Այստեղ դիրքաւորուած հետեւակային ճրդ գնդի զինուորները, որոնք համալրուած էին գլխաւորապէս պահեստագօրից, ցանկանում են լքել դիրքերը: Միայն Նազարբեկեանի ազդու միջամտութիւնից յետոյ, շարունակում են մարտը⁴³:

Հակառակորդի գրոհը ետ մղուեց, որից յետոյ զօրավարն իր ուժերով անցնում է հակայարձակման: Իր հերթին Անդրանիկը յարձակման տանելով մարտիկներին թուրքերին դուրս է մղում Բարձիշի գիւղից, որով վերջնականապէս ամրապնդեց ռուսների յաղթանակը: Մարտը դադարում է միայն գիշերը⁴⁴:

Ապրիլի 19ին Նազարբեկեանը հրամայում է սկսել Խալիլի զօրաբաժնի հետապնդումը: Նոյն օրը ստացում է Զօրավար Չեռնոզուբովի շնորհաւորական հեռագիրը ուղղուած Նազարբեկեանին եւ յայտնում է, որ նա ներկայացուել է Ա. Գէորգիի խաչով պարգեւատրուելու համար: Ստացուեց նաեւ Կովկասի փոխարքայ Վորոնցով-Դաշկովի շնորհաւորական հեռագիրը:

Դիմանի ճակատամարտում թուրքերի կորուստը եղել է մօտ երկու հազար սպանուած, իսկ ռուսներինը՝ 600 սպանուած եւ 800 վիրաւոր⁴⁵: Կամավորներից զոհուեց 21, վիրաւորուեց 55 հոգի⁴⁶:

Ապրիլի 19ին Ադրբեջանական Զոկատի կազմում Կովկասեան Բ. Հրաձգային Բրիգադը շարժում է Վանի ուղղութեամբ: Ինչպէս

պարզում է յետագայում, Խալիլի ուժերի հետապնդումը հարկադրում է վերջինիս օգնության հասնել Վանը պաշարող թուրք-քրդական ուժերին⁴⁷: Զորավարը ուրախությամբ արձանագրում է, որ Մայիսի 4ին Վանը ազատագրում է թուրք-քրդական շրջապատումից, որոնք տեղեկանալով ռուսական ուժերի առաջխաղացման մասին, շտապում են փախչել:

Մայիսի 2ին Նազարբեկեանի զորամասը շարժում է Դերիկ: Այստեղ նա այցելում է Ս. Բարթուղիմէոսի Վանքը, որտեղ մնացել էին շինության փլատակները: Զորավարին՝ վանքը, նրա պատմությունը ներկայացնում է Ա. Խմբի կամավոր Աշխարիբէկ Քալանթարը՝ մասնագիտությամբ հնագետ եւ պատմաբան:

Վանքն ամբողջությամբ կողոպտուած էր, քրդերը նոյնիսկ փորձել էին քանդել Ս. Բարթուղիմէոսի աճիւնը, սակայն նրանցից մէկի անակնկալ մահը թոյլ չէր տուել աւարտել դամբարանի թալանը⁴⁸:

Նազարբեկեանը վկայում է այն ջերմ ընդունելության մասին, որ ցուցաբերում են Վանի բնակիչները կամավորներին եւ ռուսական զորքին, իսկ Բայազէտի ջոկատի հրամանատար (Սնդրկասպեան Կազակային Զորամասի հրամանատար) զորավար Անդրէյ Նիկոլաեւին, որը նշանակուել էր Վանի զինուորական պարետ, Արամ Մանուկեանը յանձնում է քաղաքի բանալիները: Զորավարը արձանագրում է այն կարեւոր փաստը, որ Արամը ռուսական հրամանատարության կողմից նշանակուած է Վանի եւ ազատագրուած գաւառների նահանգապետ: Նազարբեկեանը հպարտությամբ հաւաստում է. «Վանի պաշտպանութիւնը ցոյց տուեց, որ հայերը աղքատիկ միջոցներով կարող են հակահարուած տալ ուժեղ թշնամուն»⁴⁹:

1915 Յունիսի 10ին Կովկասեան Բ. Հրաձգային Բրիգադը Չովս Գեաղուկի Լեռնանցքով շարժուեց Վան, ուր հասաւ Յունիսի 14ին, բանակեց քաղաքի մօտիկ Կուրուբաշ գիւղում: Ճանապարհին, բոլոր բնակավայրերում հանդիպում էին հայերի դիակներ, որոնց սպանել էին քրդերը եւ Ջեւէթթ թէյի ելուզակները⁵⁰:

Յունիսի 15ին զորավարը, Ա. Խմբի բժիշկ Տէր-Թովմասեանի հետ այցելութեան են գնում Արամին, սակայն պարզում է, որ նա շտապ գործերով մեկնել է գաւառ: Փոխարէնը ծանօթանում է փոխ-նահանգապետ Պարոյր Լեռնեանի հետ: Նազարբեկեանը

հետեւեալ կերպ է նկարագրել Վանը. «Քաղաքի տեսքը շատ գրաւիչ էր եւ մաքուր: Այն ամբողջութեամբ կանաչի մէջ էր եւ լաւ տպատւորութիւն էր թողնում: Փողոցները բաւականին լայն էին»⁵¹:

Երեկոյեան վերադառնալով Կուրուքաշ, զօրավարը ընդունում է քաղաքի ու նահանգային իշխանութիւններից կազմուած պատուիրակութեանը. նրանց հետաքրքրում էր միայն մէկ հարց՝ որքանով է կայուն իրադրութիւնը: Զօրավարը, լաւ գիտենալով, թէ ինչպէս կարող է իրադրութիւնը կտրուկ փոխուել, որոշակի ոչինչ չի ասում: Նա միայն խորհուրդ է տալիս լաւ կազմակերպուել եւ յոյսը դնել իրենց վրայ⁵²:

Բայազէտի Ջոկատի կողմից Վանը գրաւելուց յետոյ, հակառակորդը սկսեց ուժեր կուտակել Վանայ Լճի հարաւային ափին: Այդ կողմից Վանը պաշտպանելու նպատակով այնտեղ ուղարկուեց առաջապահ ջոկատ զօրավար Իւան Տրուխինի գլխատրութեամբ: Բացի ռուսական ստորաբաժանումներից ջոկատի կազմում ընդգրկւում են Հայկական Ա., Բ., Գ. եւ Դ. խմբերը: Համատեղ ուժերով յաջողում է հակառակորդին փախուստի մատնել եւ գրաւել նրա չորս թնդանօթները:

Զօրավարը իր յուշերում վկայակոչում է սահմանապահ գումարտակի հրամանատար, գնդապետ Ուշակովի կողմից հայ հրամանատարներին տրուած գնահատականները: Կարելի է ենթադրել, որ Նազարբեկեանը վկայակոչելով ռուս զինուորականին, խուսափել է անձամբ գնահատականներ տալ, սակայն, ելնելով այն հանգամանքից, որ վկայակոչում է գնդապետին, կարելի է ընդունել է, որ ինքն էլ որոշ չափով համաձայն է:

«Քեռի: Հայկական դրուժինաների պետերից առաւել համակրելին է: Ռազմական գործը գործնականում լաւ է հասկանում եւ որպէս հրամանատար մարտի ժամանակ իր տեղում է: Նկատուել է միջամտութիւնները մանրութեամբ...: Ռուս սպաների շրջանում վայելում է յարգանք, չնայած ռուսերէն չգիտէր: Շատ քաջ է եւ մարտում սառնասիրտ: Ղեկավարութիւնից իրեն հեռու է պահում:

Համազասպ: Խելօք, հասկացող, փոքր ինչ անտեղի իրարանցման ենթարկուող: Սիրում է երեւալ ղեկավարութեան առջեւ: Ռազմական գործը հասկանում էր, սակայն խուսափում էր իրեն ռիսկի ենթարկել: Քաղաքավարի է եւ մարդամօտ:

Դրո: Շատ խելացի է: Բանիմաց: Տաքարին: Մարտը լաւ է ղեկավարում: Քաջ է, սիրում էր զբաղուել քաղաքականութեամբ եւ այդ մասին գրոյցներ վարել: Երբեմն մատնում էր իր հակառուս լինելը: Իր էութեամբ դաժան է: Ռուսական ղեկավարութիւնը եւ սպայութիւնը նրան չէին սիրում:

Անդրանիկ: Իր մեծամտութեամբ բոլորի վրայ վատ տպատրութիւն էր թողնում: Զօրադասատրման հետ հաշուի չէր նստում, հրամանները չէր կատարում: Ձեյվայի մօտ մարտի նախօրեակին, երբ ամէն ինչ պատրաստ էր, առաջարկեց գրոհի իր ծրագիրը, որը ռազմական տեսանկիւնից անգրագէտ էր կազմուած եւ աչքի էր ընկնում անսովոր բարդութեամբ: ...Ընդհանրապէս զգացում էր որ նա ի զօրու չէ ղեկավարել մեծ ջոկատ: ...Քեռիին, Համազասպին եւ Դրոյին չի կարելի կշտամբել անկարգապահութեան համար»⁵³:

1915 Յունիսի 16ին զօրավարը իր զօրագնդով շարժում է Վանայ Լճի հիւսիսային ափով: Ճանապարհին հանդիպում են դատարկ, սակայն տեսքով բարեկեցիկ հայկական գիւղերը, որոնք ակերում էին ու լի մարդկանց ու կենդանիների դիակներով:

Յունիսի 18ին զօրագնունդը բանակում է Փանզ հայկական գիւղում, իսկ Յունիսի 21ին հասնում են Արճէշ: Զօրավարի վկայութեամբ, ռուս զինուորներին, որոնց թում կային նաեւ Կուբանից, զարմացրել էին տեղի գաւառի հացահատիկի բերքառատութիւնը, որը գերազանցում էր իրենցը⁵⁴: Տների մեծ մասը քանդուած էր, բնակչութիւնը հիմնականում կանայք եւ երեխաներ էին՝ տղամարդիկ սպանուել էին: Արճէշ չեն մտնում, քանի որ քաղաքում տարածուած էր բժատոր տիֆը: Վանայ Լճի հիւսիսային ափով անցնելիս լսում էին հարաւից եկող հրացանածգութեան եւ հրետանու կրակոցների ծայները:

Յունիսի 23ին զօրագունդը հասնում է հայկական Նորաշէն գիւղը, իսկ յաջորդ օրը զօրավարը հրաման է ստանում առաջանալ դէպի Ադիլջեւազ (Արծկէ): Յունիսի 26ին Արծկէից զօրագունդը շարժում է Խանիկ, ուր հասնում է երեկոյեան ժամը 17ին: Ճանապարհին հանդիպում են քրդական գիւղեր իրենց բնակիչներով, իսկ Խանիկում բնակւում էին չերքէզներ⁵⁵, որոնք հեռացել էին նահանջող օսմանեան զօրքի հետ:

Յունիսի 27ին Նազարբեկեանը զօրախումբի հրամանատար զօրավար Պիոտոր Օգանովսկուց ստանում է հրաման՝ Յունիսի 28ին յարձակուել Կոփի ուղղությամբ: Հրամանատարը միաժամանակ յանդիմանում է Նազարբեկեանին, որ նրան չի յաջողուել ոչնչացնել Խալիլ բեյի զօրաբաժինը, որին զօրավարը հակադարձում է, ասելով, որ դժուար էր առկայ ուժերով շրջապատել հակառակորդի զօրաբաժինը, որը մշտապես հնարատրութիւն ունէր նահանջել եւ լրացնել ուժերը⁵⁶:

Յունիսի 28ին զօրամասի հրամանատարի կարգադրութեան համաձայն Կովկասեան Դ. Հրաձգային Գունդը ուղղում է Լաթեր, ապա Դերիկ, որտեղ գտնւում էր զօրավար Օգանովսկու շտաբը:

Յունիսի 29ի առաւօտեան ռուսական ուժերը անցնում են յարձակման՝ նպատակ ունենալով թուրքերին դուրս մղել Կոփից եւ գրաւել Փուրխուս գիւղը: Սակայն յարձակումը աւարտում է անյաջողութեամբ, ռուսներն ունենում են զգալի կորուստներ: Կովկասեան Է. Հրաձգային Գնդի հրամանատար, գնդապետ Վսեվոլոդ Օբրազցովին⁵⁷ յաջողում է գրաւել Փուրխուսը, սակայն նա աջակցութիւն չի գտնում 66րդ Դիվիզիայի ստորաբաժանումներից, որի հետեւանքով ստիպուած է լինում նահանջել:

Յունիսի 29ին հակառակորդը՝ ստանալով համալրում, անցնում է յարձակման: Ռուսական հրամանատարութեան կողմից ձեռնարկուած միջոցներն աւարտում են անյաջողութեամբ, քանի որ հակառակորդին յաջողուել էր գրաւել տեղանքի վրայ գերիշխող բարձունքները:

Յունիսի 30ին Նազարբեկեանը հրաման է ստանում իր ուժերով՝ Կովկասեան Ե. Հրաձգային Գնդով լեռնային հրետանու մէկ մարտկոցով շարժուել Լաթեր գիւղը, իսկ Յունիսի 1ին գրոհել եւ գրաւել Թորթօն գիւղը: Հետախուզական տուեալներից հետեւում էր, որ հակառակորդը կարողացել էր լաւ նախապատրաստուել. գերիշխող բարձունքները գտնւում էին նրա ձեռքում, խրամատները միջանի շարք էին: Թշնամու ուժը գնահատւում էր մօտ երեք գումարտակ: Փաստօրէն, յարձակումը յղի էր մեծ կորուստներով, ուստի Նազարբեկեանը որոշում է օգտագործել իր գերազանցութիւնը հրետանիում: Յաջողութեանը նպաստեց այն, որ մարտկոցներից մէկին յաջողուեց թեւային կրակ բացել, որը եւ որոշեց յարձակման ելքը: Թուրքերը չկարողացան դիմակայել եւ

խոնապահար փախուստի են դիմում: Զորավարը յուշագրում է. «Երբ մենք մօտեցանք հակառակորդի դիրքերին կամ անելի ստոյգ խրամատներին՝ ապշեցինք այն տեսարանից, որ յառնեց մեր դէմ: Բոլոր խրամատները բառիս բուն իմաստով լցուած էին դիակներով, որ հետեանք էր այն երկու թնդանօթների շրապնելային»⁵⁸ կրակի, որոնք կրակել էին խրամատների երկայնքով: Մարդկանց մեծ մասը բարձրահասակ էին, ամրակազմ, թուփ դէմքերով եւ հանդերձանքը շատ լաւն էր»⁵⁹:

Նոյն օրը զօրավար Օգանովսկին հրամայում է Յունիսի 2ի առաւօտեան Ե. Գնդի մէկ գումարտակով եւ չորս լեռնային թնդանօթներով տեղակայուել Կեկերլի գիւղում: Դա նշանակում էր թուլացնել Ե. Գնդին: Նազարբեկեանը գտնում էր, որ հակառակորդը լրացուցիչ ուժեր ստանալով անպայման փորձելու է վերադարձնել կորցրած դիրքերը եւ գունդը կը յայտնուի դժուարին իրավիճակում: Սակայն, զօրավար Օգանովսկին մնաց իր տեսակէտին: Նազարբեկեանը հրամայում է Դոկուչաեւին՝ ամրացնել դիրքերը եւ ուշադիր լինել, քանի որ հաւանական է, որ գիշերը թուրքերը կը փորձեն անցնել յարձակման:

Գալով Կեկերլի գիւղը, զօրավարը տեղեկանում է, որ իր ենթակայութեան ներքոյ անցնելու են կազակների⁶⁰ 22րդ Գումարտակը երկու թնդանօթով, Կովկասեան Զ. Գնդի երկու գումարտակ եւ Լաբինսկեան Կազակային Գունդը:

Հակառակորդի դիրքերի վրայ յարձակումը սկզբնապէս յաջող ընթացաւ: Աջ շարասիւնը, հրետանու աջակցութեամբ արագօրէն առաջ էր շարժում եւ սպառնում դուրս գալ հակառակորդի թիկունքը, նաեւ նկատում էր, որ թուրքերի շրջանում խոնապ էր սկսել: Զօրավարի մօտ է գալիս զօրամասի շտաբի պետի պաշտօնակատար կապիտան Մ. Զինկելիչը⁶¹: Ընդհանուր առմամբ յարձակումը ընթանում էր ըստ նախատեսուած ծրագրի: Սակայն, այդ նոյն ժամանակ, թիկունքում՝ Թորթօսի կողմից լուսեցին հրետանային եւ հրացանային կրակոցներ: Միաժամանակ զօրավար Նազարբեկեանի ուժերի ուղղութեամբ շարժում էին հակառակորդի մեծաքանակ ուժեր: Զօրավարի համար պարզ դարձաւ, որ գնդապետ Դոկուչաեւը չի կարողացել զսպել հակառակորդին եւ այժմ թուրքերը յարձակում են

Թորթոնի կողմից: Իրավիճակը ծանր էր: Երեք կողմից Նազարբեկեանի վրայ էին ուղղվել թշնամու մեծաքանակ ուժերը:

Զորավարի հրամանով ձեռնարկում են համապատասխան միջոցներ հակառակորդի յարձակումը ետ մղելու համար: Ռուսական հրետանու դիպուկ կրակը հարկադրում է նրանց դադարեցնել յարձակումը: Միաժամանակ կապիտան Հինկելիչը պատրաստականություն է յայտնում գնալ Ե. Գնդի մօտ եւ իմանալ մանրամասները: Որոշ ժամանակ անց կապիտանը զեկուցում է, որ գնդապետ Դոկուչանսկի ուժերը, վաղ առաւօտեան ենթարկուել են թուրքական յարձակմանը եւ նահանջել Թորթոնից:

Զորավարի վկայութեամբ, այդ ծանր պահին իրեն է մօտենում Լաբինսկեան Կազակային Գնդի զօրային աւագ⁶² Պիոտր Աբաշկինը⁶³ եւ խնդրում թոյլատրել իր հեծելագնդով անցնել յարձակման, քանի որ տեղանքը յարմար էր նման գործողութեան համար: Նազարբեկեանի խոստովանութեամբ՝ «անկեղծօրէն ասած, ես շատ զարմացայ այդպիսի նախաձեռնութեանը, եւ իհարկէ, ուրախութեամբ համաձայնուեցի»⁶⁴:

Կազակային հեծելագնդի սրընթաց եւ անսպասելի յարձակումը ցնցող ազդեցութիւն է թողնում թուրքերի վրայ, որոնք սկսում են անկանոն նահանջի: Յարձակման է անցնում հե-տեակը: Գերում են հակառակորդի մօտ 300 զինուոր եւ միքանի սպայ⁶⁵:

Յաջորդ օրը զօրավարը հրաման է ստանում տեղում թողնել 2. Գնդի մէկ գումարտակ, 2 լեռնային թնդանօթ եւ պլաստունեան 4 գումարտակներով շարժուել Թորթոն, ապա Նազիկ՝ թուրքերի թիկունքը, որոնք գտնւում են զօրավար Գ. Շարպանտիէի⁶⁶ ջոկատի դիմաց, ապա ուղղուել Մուշ: Նշուած գործողութիւնը իրականացնելու էին միաժամանակ միքանի ջոկատներ:

Զօրավարի յուշերից հետեւում է, որ վերը առաջարկուած գործողութիւնը եղել է վատ կազմակերպուած, բանակային հետախուզութիւնը որեւէ յստակ տեղեկութիւն չի կարողացել հայթայթել հակառակորդի ուժերի եւ տեղակայման վերաբերեալ եւ միայն երջանիկ պատահականութիւնն է փրկել Նազարբեկեանի ջոկատը ոչնչացումից⁶⁷:

1915 Յուլիսի 5ին զօրավարի ջոկատն անցնում է յարձակման Նազիկ եւ Մեծք գիւղերի ուղղութեամբ, գրաւելով բնակավայրերը:

Իսկ Թափավանք գիւղի մօտ կազակները գերում են մօտ 500 թուրք զինուորների, որոնց ուղարկում են Մանազկերտ⁶⁸:

Ճանապարհին հանդիպում են թուրք-քրդական գազանութիւններից հրաշքով փրկուած հայերի, որոնք հիմնականում Մշոյ դաշտի հայկական բնակավայրերից էին: Ռուս զինուորները, չնայած յոգնութեանը, պատրաստակամութեամբ գրկում կամ ուսերի վրայ տանում էին երեխաներին⁶⁹: Զօրավարի խոստովանութեամբ, ինքը ցանկանում էր որբերից մէկին որդեգրել, սակայն տղան հրաժարում է առաջարկից՝ ասելով, որ ինքը պէտք է գտնի իր ծնողներին, եթէ ողջ չգտնի, ապա պէտք է վրէժխնդիր լինի թուրքերից:

Յուլիսի 7ին զօրավարը շարունակում է յարձակումը եւ հասնում Նեմրութ Լեռան լանջին գտնուող Քանաշիր գիւղը, որի բնակչութիւնը ամբողջութեամբ սպանուած էր:

Զօրավարը իր միջանի յանձնակատարներով շարժում է Մուշ տանող ճանապահով, նպատակ ունենալով հասնել Վարդենիս գիւղը: Հեռուից նա ականատես է լինում, թէ ինչպէս են այրում գիւղերը: Սակայն, հրաման է ստացւում մէկ գունդ ուղարկել զօրավար Շարպանտիէին:

Ինչպէս նշում է իր յուշերում Նազարբեկեանը, տազնապալի լուրեր էին հասնում, թէ թուրքերը մեծ համալրում են ստացել եւ թէ իրավիճակը Քոփի եւ Մանազկերտի շրջանում տազնապալի է:

1915 Յուլիսի 8ին Նազարբեկեանը ստանում է նահանջի հրաման: Յուլիսի 9ին նրա ջոկատը Քանաշիր գիւղից դուրս է գալիս եւ հասնում Թափավանք: Ստացւում էին տազնապալի լուրեր: Այսպէս, Լաբինսկեան Կազակային Գնդի հրամանատար, գնդապետ Ա. Նոսկովը⁷⁰ Մշոյ դաշտից յայտնում էր, որ առաջանում են թուրքական 12 գումարտակ⁷¹: Թափավանքում զօրավարը հրաւիրում է սպայական խորհրդակցութիւն՝ ցանկանալով իմանալ նրանց կարծիքը, թէ ինչ անել: Սակայն ոչ ոք որեւէ յստակ կարծիք չի յայտնում: Ի վերջոյ Նազարբեկեանը վճռում է նահանջել: Այս գործողութիւնը կապուած էր մեծ դժուարութեան հետ, քանի որ Մշոյ Դաշտից գալիս էին մեծ թուով փախստականներ, անհրաժեշտ էր ապահովել նրանց անվտանգութիւնը: Զօրավարը վկայում է. «Շատ զինուորներ, չնայած յոգնածութեանը, իրենց ուսերի վրայ էին տանում փախստական-

ների երեխաներին: Թափավանքում ականատես եղայ հետետեալ տեսարանի՝ մէկտանի մի հայ խնդրում էր զինուորներին փրկել իր փոքրիկ եղբայրներին: Հայ զինուորները պատրաստակամութեամբ ընդունեցին նրանց, ցանկանում էին նոյնպէս եւ նրան (աւագ եղբօրը - Ռ.Ս.) նստեցնել փամփուշտներ [տեղափոխող] երկանիւ սայլակին, սակայն նա կտրականապէս հրաժարուեց հետեւել նրանց, ասելով, որ որոշել է մեռնել իր տանը»⁷²:

Նազարբեկեանի ջոկատը մէկ օրուայ ընթացքում անցաւ 50 վերստ ճանապարհ եւ բանակեց Փուրխուս գիւղում: Զօրավարը յուշագրում է իր առաջին հանդիպումը Դրոյի եւ նրա խմբի հետ: Նազարբեկեանի խոստովանութեամբ, ե՛ւ Դրօն ե՛ւ Բ. Խումբը լաւ տպատրութիւն են թողնում ե՛ւ իր ե՛ւ շրջապատի վրայ: «Դրոժի-նան արտաքինով յիշեցնում էր լաւ, կանոնաւոր զօրամաս»⁷³:

Ա. Խումբը տեղ է հասնում բաւականին վատ վիճակում. կամաւորները յոգնել էին երկարատեւ ռազմարշափց յետոյ, բացի այդ, նրանք ճնշուած վիճակում էին, որի պատճառը նահանջն էր: Նրանցից շատերը Մշոյ Դաշտի գիւղերից էին եւ խիստ մտահոգուած էին այնտեղ մնացած հարազատների ճակատագրով:

1915 Յուլիսի 19ի առկայ ուժերով Նազարբեկեանը մտնում է Առնիս, որտեղից դուրս է գալիս Յուլիսի 20ին՝ մեծ թուով փախստականների հետ: Առնիսում զօրավարը թողնում է Կովկասեան Է. Հրաձգային Գնդի մէկ գումարտակ, Ա. եւ Բ. Հայկական խմբերը, Ներչինսկեան Կազակային Գունդը եւ հրետանու մէկ մարտկոց՝ հրամայելով սպասել այնքան մինչեւ որ անցնեն վերջին փախստականները Արճէշից եւ Վանից:

Բերկրիի կիրճում կուտակուել էին մեծ թուով փախստականներ: Կրկին զօրավարի աջքի առջեւ յառնում են 1914 Դեկտեմբերի հայ եւ ասորի փախստականների պատկերները:

Նազարբեկեանի համար անբացատրելի էր Վան քաղաքից նահանը: Նրա համոզմամբ Վանին ոչ մի վտանգ չէր սպառնում: Քաղաքում եւ շրջակայքում կային բաւականչափ ուժեր, որոնք ի զօրու էին պաշտպանել Վանը: Զօրավարին զարմացրել էր նաեւ այն, որ զօրավար Նիկողայեի Բայազէտի Ջոկատն այնքան շուտափոյթ է անցել Բերկրիով՝ դրանով փախստական հայերի շրջանում առաջացնելով մեծ խուճապ: Նազարբեկեանի

համոզմամբ. «այդ նահանջը, որը չունէր որեւէ հիմք, պէտք է համարել յանցաւոր: Զօրավար Նիկոլատի ջոկատին ոչինչ չէր սպառնում...: Հակառակորդը ճնշում չէր գործադրում, եւ չէր էլ երեւում, որ նրա ուժերը զգալի էին:... Յետագայում դէպքերը ցոյց տուեցին այդ նահանջի, աւելի ստոյգ՝ փախուստի անիմաստ լինելը: Այդ անմիտ քայլի հետեւանքը եղաւ մեծ թուով փախստականների կորուստը եւ նրանց լիակատար սնանկացումը»⁷⁴:

Բերկիրում զօրավարը հրաման է ստանում առանց կանգառի շարժուել նախկին ռուս-թուրքական պետական սահմանը: Փախստականներին պաշտպանում էին Դոյի խումբը եւ նրան կամաւոր միացած սահմանապահների հեծելավաշտը⁷⁵ հեծելավաշտի հրամանատար Կորոլկովի հրամանատարութեամբ:

Նազարբեկեանի վկայութեամբ ողջ ճանապարհը լեւի-լեցուն էր փախստականներով, այստեղ կամ այնտեղ կային մահացած ծերունիների եւ երեխաների դիակներ: Այդ հանգամանքը կրկին ու կրկին բերում էր այն մտքին, որ զօրավար Նիկոլատի աննպատակ եւ արագ նահանջի հետեւանքով տեղի ունեցան նման դժբախտութիւններ: Զինուորները եւ կազակները հնարաւորութեան սահմաններում օժանդակում էին փախստականներին:

1915 Յուլիսի 21ից մինչեւ 23ը զօրավարի ջոկատը եւ փախստականները շարժում էին նախկին պետական սահմանի ուղղութեամբ, կատարելով կարճատեւ կանգառներ: Բոլորին ուրախացրեց այն հանգամանքը, երբ յայտնուեցին Ռուսական Կայսրութեան տարածքում եւ կանգառ ունեցան Կըզըլ Դիզէում, ապա Դիադինում: Ռուսական ուժերի ձեռնարկած յարձակումը հարկադրում է թուրքերին նահանջել: Այստեղ իր դերն ունեցաւ զօրավար Եուդէնիչի կողմից կազմուած մարտական ծրագիրը, որը փայլուն կերպով իրականացրեց զօրավար Ն. Բարաթովը⁷⁶:

1915 Յուլիսի 30ին Նազարբեկեանի զօրագունդը կայանում է Խամօ գիւղում, ապա Սանժանում, որտեղ մնում են մինչեւ Օգոստոսի 14ը: Այստեղ զօրավարը փորձում է որոշ չափով բաարարել իր ջոկատի մարտիկների կարիքները՝ սկսած հագուստից վերջացրած կօշիկներով: Սակայն, համբարակային ծառայութիւնը դեռ չէր հասցրել բերել անհրաժեշտ պարագաները, ուստի զինուորների մեծ մասը շարունակում էին կրել պատահառոտում ու մաշուած հագուստ եւ կօշիկներ առանց ներբանների:

Զորավարն իր յուշերում շարունակում է անդրադառնալ 1915 յուլիսեան նահանջին: Այս անգամ նա ներկայացնում է հայ հասարակութեան շրջանում շրջանառուող լուրերը նահանջի վերաբերեալ: Նազարբեկեանը նշում է, որ Ա. եւ Բ. խմբերի Իզդիրում տեղակայուելուց յետոյ հայերի շրջանում լուրեր են տարածում, թէ ռուսական հրամանատարութիւնը դիտաւորեալ է հայ կամաւորներին ուղարկում առաջին գիծ, իսկ նրանց ետեւում տեղակայում է կանոնատուր ուժեր, որն իբր նպատակ ունի ոչնչացնել կամաւորների եւ հայերին զրկել ռազմական ուժից: Իշխանութիւնները միաժամանակ նախատեսում էին դադարեցնել կամաւորների հաւաքագրումը եւն.:

Զորավարի վկայութեամբ այդ ամէնը չեն համապատասխանում իրականութեանը: Անդրանիկը եւ Դրօն մշտապէս ձգտում էին լինել առաջին գծում, միշտ լինել առջեւում: Սակայն զօրավարը կատարում է կարեւոր մի խոստովանութիւն, որը բացատրում է հայերի շրջանում տարածուող լուրերի պատճառները: Նա գրում է. «Պատերազմի սկզբում թուրքահայերի (արեւմտահայերի - Ռ.Ս.) մօտ ուժեղ ձգտում կար ռուսների նկատմամբ, սակայն, այն բանից յետոյ, երբ նախատեսուեց Ալաշկերտի հովիտը բնակեցնել կազակներով, այդ ձգտումը ուժեղ կերպով թուլացաւ եւ տեղի ունեցաւ լիակատար հիասթափութիւն»⁷⁷:

1915 Օգոստոսի 20ին Կովկասեան Դ. Բանակային Կորպուսի շտաբից ստացւում է Կովկասեան Բանակի գլխաւոր հրամանատար Վորոնցով-Դաշկովի նամակը, ուր յայտնւում է, որ զօրավար Նազարբեկեանը, որպէս ռազմաճակատի առաւել արժանաւոր սպայ, պարգեւատրուել է ֆրանսիական «Միլիթէր» մեդալով⁷⁸:

1915 Օգոստոսի 28ին ստացւում է հեռագիր, որտեղ ասուած էր, որ Ռուսաստանի զինուած ուժերի հրամանատարութիւնն իր վրայ է վերցրել ցար Նիկոլայ Բ.ը, իսկ նախկին գլխաւոր հրամանատար, մեծ իշխան Ռոմանովը նշանակուել է Կովկասի փոխարքայ եւ Կովկասեան Բանակի գլխաւոր հրամանատար: Նազարբեկեանի գնահատմամբ, թուրը ցաւում էին Վորոնցով-Դաշկովի հեռանալուց, քանի որ բարձր էին գնահատում Կովկասի փոխարքայի եւ գլխաւոր հրամանատարի պաշտօնում նրա կատարած աշխատանքը:

Այդ նոյն ժամանակ Կովկասեան Բանակի հրամանատարութիւնը, յանձին զօրավար Եւդէնիչի լայնածաւալ, գաղտնի աշխատանքներ են նախաձեռնում Էրզրումի (Կարին) ամրոցը գրաւելու համար: Զօրամասեր ուղարկում են հրամաններ, որտեղ նշում են, որ միջոցառումներ պէտք է ձեռնարկուեն ստորաբաժանումները ձմեռային պայմանների համար նախապատրաստելու համար: Հրամայում են կառուցել ձմեռային կացարաններ, ուժեղացնել պաշտպանական ամրութիւնների շինարարութիւնը, կառուցել բաղնիքներ են.: Թիկունքային ծառայութիւնները սկսում են զանազան շինանիւթերի եւ այլ պարագաների մատակարարումը, որոնք պէտք է օգնէին արագօրէն կազմակերպել բանակի ձմեռումը: Այդ ամէնը կատարում էր բացայայտ: Իրականում, վերը նշուած բոլոր միջոցառումները նպատակ ունէին մոլորեցնել հակառակորդին, որպէսզի վերջինս անտեղեակ մնար ռուսական հրամանատարութեան նախապատրաստութիւններին: Բացի այդ, օսմանեան հրամանատարութիւնը, հաշուի առնելով 1914-1915ի ձմեռային մարտական գործողութիւնների փորձը, գտնում էր, որ աշնանային եւ ձմեռային պայմաններում ռուսները չեն նախաձեռնի որեւէ յարձակողական գործողութիւն: Զօրավար Եւդէնիչը շտապում էր իրականացնել Էրզրումի գրաման գործողութիւնը, որովհետեւ յայտնի էր դարձել, որ դաշնակիցները որոշել են 1916 Յունուարին դադարեցնել նեղուցների գրաման գործողութիւնը: Իսկ դա հնարաւորութիւն կը տար օսմանեան հրամանատարութեանը Դարդանէլի շրջանից լրացուցիչ ուժեր տեղափոխել ռուս-թուրքական ռազմաճակատ եւ դա ստիպում էր Եւդէնիչին արագացնել նախատեսուող գործողութիւնը:

1915 Հոկտեմբերին Նազարբէկեանի Կովկասեան Բ. Հրաձգային Բրիգադը վերակազմաւորում է որպէս Կովկասեան Բ. Հրաձգային Դիվիզիայի: Կովկասեան Դ. Բանակային Կորպուսի հրամանատար զօրավար Օգանովսկին յայտնում է Նազարբէկեանին, որ ինքը նրան ներկայացրել է զօրավար-տեղակալի կոչմանը: Սակայն, ինչպէս պարզում է յետագայում, զօրամասի հրամանատարի ներկայացումը անհասկանալի պատճառներով «անհետանում» է: Զօրավար Օգանովսկին, որին տեղափոխում են Մինսկ, Նազարբէկեանի խնդրանքով, երկրորդ անգամ է նրան

ներկայացնում զօրավար-լտեղակալի կոչմանը, սակայն ապարդիւն⁷⁹:

Բանակային հրամանատարութեան հրամանով, ձմեռային կացարաններում գտնուող զօրամասերին հրամայում է անընդիստ իրականացնել ուժեղացուած հետախուզութիւն եւ տեղեկութիւնները զեկուցել դաշտային բանակի շտաբին: Յատկապէս անհրաժեշտ էին հակառակորդից ձեռք բերել «լեզուներ»՝ գերիներ, որոնց քննութեան միջոցով հնարատր կը լինէր առաւել մանրամասն տեղեկութիւններ ստանալ: Առաջատր գծերում գտնուող ստորաբաժանումները միջանի անգամ փորձ են կատարում, սակայն, անյաջող: Գունիբեան Գնդի սպաներից, փոխգնդապետ Արտեմ Յովսէփեանցին յաջողում է գերել հակառակորդի մարտական պահպանութեան 80 զինձառայորդի⁸⁰: 1915 Նոյեմբերի 19ին զօրավար Նազարբեկեանը նշանակում է Կովկասեան Բ. Հրաձգային Դիւիզիայի պետ⁸¹:

Իր յուշերում զօրավարը յիշատակում է զինուորական քահանայ Ռուբէն Բեկզուլեանցին, որը այցելում էր զօրամասեր՝ հայ զինուորների հոգետր պահանջները բաւարարելու համար: Նա միաժամանակ աշխուժ օգնում էր որբ երեխաներին թիկունք տեղափոխելու գործում⁸²:

1915 Նոյեմբերի 29ին զօրավար Նազարբեկովը հրաման է ստանում անցնել յարձակման: Իր յուշերում, նա քննադատում է հրամանատարութեանը նման հրամանի համար, քանի որ զինձառայորդները զգալի ջանքեր էին գործադրել իրենց կենցաղային պայմանները ապահովելու համար: Բացի այդ, զգալի նիւթական միջոցներ էին տրամադրուել թիկունքի ապահովման համար: Սա վկայում է այն մասին, որ Էրզրումի գործողութիւնը նախապատրաստուել է գաղտնիութեան այնպիսի պայմաններում, որ նոյնիսկ դիւզիայի հրամանատարները տեղեակ չեն եղել այդ մասին: Հենց այս հանգամանքն էլ եղել է այն հիմնական գրաւականը, որը հնարատրութիւն տուեց զօրավար Ետեմիչին փայլուն կերպով իրականացնել իր մտայղացումը:

1915 Դեկտեմբերի 29ին Կովկասեան Դ. Բանակային Կորպուսի հրամանատարի պաշտօնում զօրավար Օգանովսկուն փոխարինում է զօրավար-տեղակալ Վլադիմիր դէ-Վիտտը: Նազարբեկեանը ցաւով է նշում զօրավարի հեռանալու մասին, քանի որ

նա գրեթե միակն էր, որ լաւ էր վերաբերում հայերին եւ գնահատում էր հայկական կամաւորների կատարած աշխատանքը:

Դեկտեմբերի սկզբներին տեղացած ուժեղ ձիւնը դժուարացնում է զօրամասերի առաջխաղացումը: Այնուամենայնիւ ռուսական զօրքը շարունակում է յարձակումը: Ինչպէս նշում է զօրավարը, հայկական Ա., Բ., Գ., եւ Դ. խմբերը եւս մասնակցում են մարտական գործողութիւններին: Զարմանալի է, որ նա չի յիշատակում Զ. եւ Է. խմբերի մասին: Յատկապէս՝ Զ.ն, որը մասնակցել է Էրզրումի գործողութեան: Մնացած խմբերը, ռուսական եւ կազակական ստորաբաժանումների հետ իրականացնում էին թիկունքի պաշտպանութիւնը քրդական ջոկատներից:

Նազարբեկեանի ուժերը առաջանում էին դժուարին պայմաններում: Հրամանատարութիւնը պահանջում էր տեղեկութիւններ՝ հակառակորդի տեղակայման եւ ուժերի մասին: Տեղեկութիւնները, սակայն, դժուար էր հայթայթել առատ ձեան եւ ձիւնամրրիկների պատճառով: Դա էր պատճառը, որ հետախուզութիւնից վերադարձածների զգալի մասը վերադառնում էր ցրտահարուած:

1915 Դեկտեմբերի 19ին ստացւում է գլխաւոր հրամանատար Ռոմանովի հրահանգը՝ աշխատել քրդերին գրաւել իրենց կողմը եւ վերացնել հայերի ու քրդերի միջեւ եղած թշնամութիւնը: Զօրավարի համոզմամբ, դժուար է պատերազմական պայմաններում եւ կարճ ժամանակահատուածում իրականացնել նման մտադրութիւն: Ինքը շատ ջանքեր է գործադրել այդ թշնամութիւնը վերացնելու կամ մեղմելու համար: Նրա գնահատմամբ. «Քրդերի մշակոյթի մակարդակը գտնւում է չափազանց ցածր հարթակի վրայ. յատկապէս քրիստոնեաների կողոպուտն ու սպանութիւնը իւրաքանչիւր քրդի համար քաջութիւն է եւ հպարտութիւն»⁸³:

Դեկտեմբերի 28ին հետախուզութիւնը տեղեկացնում է, որ զօրաբաժնի առջեւում գտնուող հակառակորդի դիրքերը, ինչպէս նաեւ գիւղերը լքուած են: Յաջորդ օրը ստացւում է Եուդենիչի հեռագիրն այն մասին, որ Թուրքեստանեան Բ. եւ Կովկասեան Ա. բանակային զօրամասերը անցել են լայնածաւալ յարձակման: Ահա այստեղ է, որ զօրավար Նազարբեկեանին յայտնի են դառնում Եուդենիչի նախապատրաստութիւնները: Զօրավարը վկայում է, որ լուրեր էին տարածուել, որ հրամանատարը վաղուց

էր որոշել անցնել յարձակման, սակայն գլխաւոր հրամանատար Ռոմանովը կտրականապէս դէմ է եղել: Ի վերջոյ զօրավար Եուդենիչը որջ պատասխանատուութիւնն իր վրայ է վերցրել:

1916 Յունուարի ընթացքում զօրավար Նազարբեկեանի զօրամասերն իրականացնում էին ուժեղացում ինտախուզութիւն, որ դժուարանում էր անընդիստ տեղացող ձեան պատճառով: Ժամանակին չէր ստացում պարէն: Չինուորների սնունդը խիստ սառնամանիքների պայմաններում անբաւարար էր, որն անդրադառնում էր նրանց մարտունակութեան վրայ: Գերի քրդից տեղեկանում են, որ հակառակորդը նահանջում է: Զօրավար Նազարբեկեանի ուժերը կարողանում են գրաւել Խնուսը: Գրոհին անմիջական մասնակցութիւն են ունենում նաեւ հայ կամաւորները: Զօրավարին զարմացրել էր ռուս հետեւակայիների կողմից մինչեւ գօտկատեղ հասնող ձեան պայմաններում հակառակորդի դիրքերի գրաւումը:

1916 Փետրուարի 3ին Նազարբեկեանը հրամայում է գրաւել Եփրատի գետանցումը եւ հնարաւորութեան դէպքում, նաեւ Մուշը: Նոյն օրը գիշերը, Մուշը գրաւում է Նազարբեկեանի զօրամասերից մէկի եւ հայ կամաւորների կողմից:

Փետրուարի 3ին ռուսական զօրքերը գրաւում են Էրզրումը: Ահա թէ ինչպէս է գնահատել այդ գործողութիւնը՝ Նազարբեկեանը. «Չնայած դաժան եղանակին, դժուար տեղանքին, պարէնի անխուսափելի պակասին եւ արեւմտքից ու հարաւից թուրքերի օգնութեանը, [մարտերում] կոփուած Կովկասեան Բանակին յաջողում է հնգօրեայ անօրինակ գրոհից յետոյ գրաւել Էրզրումը՝ Փոքր Ասիայում (Արեւմտեան Հայաստանում - Ռ.Ս.) թուրքական յենարանը: Նրա անկումն անխուսափելի էր, սակայն, որ այդ կարող էր տեղի ունենալ այդքան արագ՝ մեզ համար անակնկալ էր»⁸⁴: Էրզրումի գինուորական պարէտ է նշանակում Կովկասեան Բ. Հրաձգային Դիւիզիայի 2. Գնդի հրամանատար, գնդապետ (յետագայում՝ զօրավար) Սիլիկեանը⁸⁵:

Մուշում մնացել էին մօտ 50 ընտանիքներ, որոնց թում կային նաեւ հայեր: Հայերի մեծ մասը սպանուել էր 1915ի ամռանը: Ողջ էին թողել միայն արհեստաւորների: Քաղաքում պարէնը սակաւ էր, հայկական թաղամասը՝ գրեթէ ամբողջութեամբ քանդուած:

Չնայած թուրքերը ծանր պարտութիւն էին կրել եւ նահանջել էին, քրդերը գտնուելով լեռներում շարունակում էին յարձակումները: Նրանց մարտավարութեան առաւել «սիրուած» տեսակը՝ դարանը եւ մեծաքանակ ուժերով յարձակումն էր: Այսպէս 20 քուրդ դարանակալ, յարձակուել էին եօթ ռուս զինուորների վրայ, սպանելով նրանցից երեքին: Նազարբեկեանը ստիպուած էր պատժիչ ջոկատ ուղարկել՝ քրդերին պատժելու համար⁸⁶:

1916 Փետրուարի 8ին Նազարբեկեանը մէկ գումարտակ երկու թնդանօթով եւ կազակային հարիւրեակ ուղարկում է Բիթլիսի (Բաղէշ) ուղղութեամբ քրդական յարձակումները կասեցնելու նպատակով: Յաջողում է ջախջախել քրդերին եւ զգալի կորուստներով հարկադրել դիմել փախուստի:

Նազարբեկեանը հրաման է ստանում Փետրուարի 11ին օգնական ուժ ուղարկել զօրավար Դիմիտրի Աբացիեւի ջոկատին, որը Դատուանից շարժում է դէպի Բիթլիս: Ճանապարհին նրանք անընդիստ ընդհարումներ են ունենում քրդերի հետ: Առաջխաղացմանը չեն նպաստում նաեւ եղանակը եւ ժամանակից շուտ վարարած գետերն ու գետակները:

Եփրատի վրայ գտնուող կամուրջներից մէկի վրայ զօրավարը հանդիպում է Քեռու խմբի երկու կամաւորների, որոնք Էրզրումից եկել էին Մուշ՝ հարազատներին փնտռելու համար: Նազարբեկեանը նկատում է, որ կամրջի ելուստներն ամբողջութեամբ կարմիր են: Կամաւորներից մէկը պարզաբանում է, որ 1915ին թուրքերը եւ քրդերը կամրջից գետն են նետել հայերին. ովքեր հրաժարուել են ենթարկուել՝ գլխատել են: Այդտեղից էլ ելուստների վրայի կարմիր գոյնը⁸⁷:

Փետրուարի 18ին Նազարբեկեանին այցելում են Մուշում մնացած մահմեդականների ներկայացուցիչները: Նրանք իրենց վրդովմունքն են յայտնում հայերի սպանդի առթիւ: Նրանցից յետոյ գալիս են ողջ մնացած հայերի ներկայացուցիչներ՝ երեք հոգի: Նրանք մանրամասն պատմում են թուրք-քրդական վայրագութիւնների մասին:

Մուշում եղած ժամանակ Նազարբեկեանին է դիմում իր ենթականերից՝ շտաբս-կապիտան Կրիմ-Շամխալովը: Նա զեկուցում է, որ իրեն յաջողուել է թուրքերից եւ հայերից մանրամասն ու ստոյգ տեղեկութիւններ հաւաքել օսմանեան

իշխանությունների կողմից հայերի նկատմամբ իրականացուած սպանդի մասին: Զօրավարը խնդրում է սպայից զեկուցագրի տեսքով ներկայացնել փաստերը, որը եւ արւում է: Կրիմ-Շամխալովի զեկուցագիրը ամբողջութեամբ ներկայացուած է զօրավարի յուշերում⁸⁸:

Մուշի հայութեան կոտորածին ականատես են եղել գերմանական միսիոնէրական առաքելութեան երկու աշխատակցուհի՝ Ալմա Եոհանսոնը եւ Բոդիլ Բիորնը:

Փետրուարի 18ի լոյս 19ի գիշերը ռուսական զօրքերը գրաւում են Բիթլիսը: Մուշի գրաւումը հնարաւորութիւն է տալիս թուրք-քրդական ջարդերից փրկուած հայերին, հիմնականում սասունցիների, իջնել լեռներից քաղաք: Զօրավարը նշում է, որ սասունցիներին օժանդակում էին քրդերը: Յաւօք, նման դէպքերը խիստ հազուադէպ էին:

Մուշից Բիթլիս տանող ճանապարհը անընդիստ ենթարկւում էր Մուսա բէկի կողմից ղեկավարուող քրդական յարձակումներին: Մուսա բէկին զօրավարը որակում է որպէս հայերի եւ ընդհանրապէս քրիստոնեաների երդուեալ թշնամի⁸⁹: Քրդերի զոհը հիմնականում դառնում էին թիկունքային ստորաբաժանումների զինծառայողները: Միքանի անգամ ձեռնարկուած պատիժիչ արշաւախմբերը որեւէ էական ազդեցութիւն չեն ունենում:

Մուշում եւ շրջակայքում գտնուող զօրամասերը եւ զօրքը գտնւում էին ծայրայեղ ծանր պայմաններում՝ չէր բաւարարւում սննդամթերքը: Համբարակային ծառայութիւնը չէր կարողանում հասցնել անհրաժեշտ պարէնը: Նազարբեկեանի խոստովանութեամբ ինքը չգիտէր, ինչ անել, որպէսզի մարդկանց ապահովի սննդամթերքով: Այս հիմնահարցը լուծում է հայ ազատագրական շարժման նշանաւոր գործիչ Ռոստոմը (Ստեփան Զորեան), որը հանդիսանում էր Համառուսաստանեան Քաղաքների Կովկասեան Միութեան լիազօրը: Նա խնդրում է զօրավարին իրեն զինուորներ տրամադրել, որպէսզի լքուած գիւղերում հացահատիկ փնտռի: Նազարբեկեանը համաձայնւում է պայմանով որ եթէ գտնուած հացահատիկի կէսը տրուի զօրքին: Փոխադարձ համաձայնութիւնը հնարաւորութիւն է տալիս լուծել պարէնի հիմնախնդիրը⁹⁰:

Նազարբեկեանը վկայում է այն գազանութիւնների մասին, որոնք կատարել էին թուրքերը եւ քրդերը Մշոյ Դաշտի հայկական գիւղերում: Նա ստանում էր համանման բազմաթիւ զեկուցագրեր ստորաբաժանումների հրամանատարներից: Զօրավարը զեկուցագրերը, ինչպէս նաեւ սպանդի լուսանկարները, գիւղատնտես եւ հասարակական գործիչ Աշոտ Աթանասեանի միջոցով, ուղարկում է Վանում գտնուող ամերիկեան ներկայացուցչին⁹¹:

Մարտի սկզբներին ստացուած հետախուզական տեղեկութիւնները վկայում են, որ թուրքերը նախաձեռնում են լայնածաւալ յարձակում: Նրանք ստացել էին օգնական ուժեր: Բացի այդ, աշխուժացել էր Մուսա բէկը, որին որպէս օգնութիւն օսմանեան հրամանատարութիւնը տրամադրել էր մօտ հազար զինուոր եւ մէկ թնդանօթ: Օսմանեան յարձակման գլխաւոր ուղղութիւնը հանդիսանալու էր Բիթլիսը:

Հիմք ընդունելով հետախուզական տեղեկութիւնները, Նազարբեկեանը որոշում է որպէս օգնական ուժ Բիթլիս ուղարկել մէկ գումարտակ եւ երկու լեռնային թնդանօթ: Միաժամանակ Մշոյ դաշտի բարձունքներում յայտնուեցին քրդական զինուած խմբեր: Մուշ եկած հայ փախստականները, որոնց ուղեկցում էին վստահելի քրդեր, յայտնում են, որ Մարտի 13ին Մուսա բէկը, մօտ հազար քրդերով անցնելու է յարձակման Բիթլիսի վրայ: Նրան հետեւելու էին օսմանեան կանոնաւոր ուժերը, այդ թում՝ Դարդանէլի շրջանից տեղափոխուած: Ինչպէս նշում են հրամանատարների զեկուցագրերում, թուրք զինուորները աչքի են ընկնում իրենց բարձր հասակով, ֆիզիկապէս լաւ պատրաստուած են եւ հանդերձաւորուած: Նրանք դիրութեամբ տեղաշարժում են լեռնային տեղանքով: Հաւանաբար սրանք այն զօրամասերի զինուորներն էին, որոնց վարժեցրել էին գերմանացի հրահանգիչները:

Ռուսական ուժերը կարողանում են ետ մղել հակառակորդի յարձակումը եւ իրենք անցնել հակաշարձակման: Մարտերում աչքի է ընկնում Հայկական Ա. Խումբը: Մարտի 15ին խմբին հրամայում է անցնել Բիթլիս՝ տեղի պաշտպանութիւնը ուժեղացնելու համար:

Մարտի 16ին Բիթլիսի համար մարտերը շարունակում են նոյն թափով: Կրկին զորամասերի հրամանատարներն իրենց զեկուցագրերում նշում են հակառակորդի լաւ սպառազինութեան եւ մարտական բարձր պատրաստականութեան, ինչպէս նաեւ քրդերի անընդհատ յարձակումների մասին: Սակայն, ռուսական ուժերը շարունակում են պահպանել իրենց դիրքերը թոյլ չտալով թուրք-քրդական ուժերին առաջանալ:

Մարտի 21ին Նազարբեկեանը հրամայում է աշխուժ գործողութիւններ ձեռնարկել քրդերին Մշոյ դաշտից դուրս մղելու համար: Սարսափահար քրդական պարագլուխները շտապում են իրենց հպատակութիւնը յայտնել ռուսներին: Այդ նոյն ժամանակ մարտերը Բիթլիսի շրջակայքում շարունակում էին նոյն թափով:

Մարտի 25ին Նազարբեկեանը ստանում է զեկուցագիր, թէ թուրքերը անցել են յարձակման: Նրանց գործողութիւններից հետեւում է, որ ցանկանում են շրջանցել ռուսների պաշտպանութեան թեւերը եւ կտրել Բիթլիսը Մուշից: Իրենց գործողութիւններն աշխուժացնում են քրդերը:

Մարտի 26ին թուրք-քրդական յարձակումը շարունակում է: Հակառակորդին յաջողում է անելի ու անելի խորանալ ռուսական պաշտպանութեան թեւերի շրջանում: Դրութիւնը դառնում էր սպառնալի: Զօրավար Նազարբեկեանը պաշտպաններին ուղարկում է իր երկու վերջին գումարտակները:

Մարտի 27ին ռուսական պաշտպանութեան դրութիւնը դառնում է օրհասական: Նրան սպառնում էր լիակատար շրջապատում: Զօրավարին զարմացնում է Դ. Կորպուսի հրամանատարութեան անտարբեր վերաբերմունքը: Մարտի 28ին Մուշ է գալիս զօրամասի հրամանատար դէ-Վիտտը: Նազարբեկեանը նրան զեկուցում է Բիթլիսի շրջանում ստեղծուած սպառնալի իրավիճակի մասին եւ որքան զարմանալի է՝ զօրամասի հրամանատարը որեւէ կարգադրութիւն չի կատարում: Նազարբեկեանը թոյլտուութիւն է խնդրում հրամանատարից Մարտի 29ին գնալ Բիթլիս, որի համար ստանում է համաձայնութիւն:

Ճանապարհին հանդիպում են սասունցի փախստականներ՝ բացառապէս կանայք ու երեխաներ: Նրանք քայլում էին պատահոտուած հագուատներով, սարսափելի ծանր վիճակում:

Դա խորապէս յուզում է Նազարբեկեանին: Նա յուշագրում է. «ես շատ էի ցանկանում քաջալերել նրանց մայրենի լեզուով, սակայն յամօթ ինձ, ես այդ կարող էի անել միայն մտովի, քանի որ այնչափ չէի տիրապետում մայրենի լեզուին, որպէսզի անձնապէս կարողանայի կատարել իմ ցանկութիւնը»⁹²:

Ճանապարհին Նազարբեկեանը տեղեկանում է, որ իրենց է մօտենում զօրամասի հրամանատարը: Այդ հանգամանքը զարմանք է պատճառում զօրավարին, որ չի հասկանում նման ընթացքի պատճառը: Բացի այդ, արդէն գիշեր էր եւ վտանգաւոր էր նման ճանապարհորդութիւնը, քանի որ կարող էր ենթարկուել քրդական յարձակման:

Բիթլիսից կրկին ստացում են տագնապալի լուրեր: Նազարբեկեանը գտնում էր, որ իրադրութիւնը կարող է փրկել միայն ու միայն իր կողմից օգնութեան ուղարկած երեք գումարտակները:

Յաջորդ օրը Նազարբեկեանը եւ Դէ-Վիտտը շարունակում են իրենց ճանապարհը եւ տեղի է ունենում անսպասելի՝ նրանց է հասնում Կովկասեան Զ. Հրաձգային Գունդը չորս լեռնային թնդանօթներով: Հրամանատարն էր գնդապետ Սիլիկեանը: Դա խիստ զարմացնում է Նազարբեկեանին: Նրա համար անհասկանալի է մնում այն հանգամանքը, թէ ինչու էր զօրամասի հրամանատարը իրենից թաքցնում գնդի մօտենալը:

Պարզուեց զօրամասի հրամանատարի մտայղացումը. նա դիտաւորեալ ուշացնում էր օգնութիւնը, որպէսզի հակառակորդը է՛լ ատելի խորանայ Բիթլիսի լեռնանցքում, որի ժամանակ Զ. Գունդը Բիթլիսի եւ Սղերդի միջեւ կ'անցնի թուրքերի թիկունքը, որով հակառակորդը կ'ընկնի շրջապատման մէջ: Սակայն, քարտէզի վրայ ծրագրուած այս գործողութիւնն ունէր իր լուրջ թերութիւնը: Ո՛չ ռուսական եւ ո՛չ էլ թուրքական ռազմական տեղագրական քարտէզներում նախատեսուող երթուղու ճանապարհները նշուած էին, քանի որ նշուած լեռնային շրջանում այսպիսիք գոյութիւն չունէին, եթէ նոյնիսկ կային, ապա գտնուում էին ձեան խորը շերտի տակ, ուստի նախատեսուած գործողութիւնը ի սկզբանէ դատապարտուած էր անյաջողութեան:

Նազարբեկեանը ստանում է ուրախալի լուր՝ Բիթլիսը կարողացել է դիմակայել շնորհիւ իր ուղարկած երեք

գումարտակների: Նրանց յաջողուել է շրջապատել թուրքական զորամասերից մէկին, ջախջախել եւ գերել մօտ 500 զինուոր եւ սպայ ու զնդացիներ⁹³:

Առաւօտեան Նազարբեկեանը ականատես է լինում մի ապշեցուցիչ դէպքի՝ լեռներից վազելով գալիս էին մօտ 50 մերկ ռուս զինուորներ: Պարզուեց, որ նրանց գերել էին քրդերը: Վերջիններս ամբողջ գիշեր խնջոյք էին կազմակերպել: Նրանք իրենց հետ բերել էին մեծ թուով երիտասարդ հայուհիների, որոնց բոլորի աչքի առջեւ բռնաբարում էին, ապա ռուս զինուորներին մերկացնելով սկսում են կրակել նրանց վրայ: Մի մասին յաջողում է փրկուել⁹⁴:

Մարտի 31ին զօրամասի հրամանատարը եւ Նազարբեկեանը հասնում են Բիթլիս: Ապրիլի 1ին Նազարբեկեանը եւ Բիթլիսի ջոկատի հրամանատար, գնդապետ Օբրագցովը ուսումնասիրում են դիրքերը: Զօրավարը մէկ անգամ եւս համոզում է, թէ ինչպիսի ծանր վիճակում է գտնուել Բիթլիսի ջոկատը եւ ինչպիսի գրեթէ անառիկ լեռնային դիրքեր են հարկադրուած եղել գրոհել զինուորները: Նոյն օրը Բիթլիս են գալիս օգնական ուժեր, որոնց թում՝ Հայկական Գ. Խումբը Համազասպի հրամանատարութեամբ: Այդ ամէնի շնորհիւ Բիթլիսում կուտակւում են զգալի ուժեր եւ հիմնալի հնարաւորութիւն է ստեղծում հակահարուածել հակառակորդին եւ գրաւել քաղաքի վրայ իշխող բարձունքները, սակայն զօրամասի հրամանատարը նոյնիսկ հարկ չհամարեց պատասխանել առաջարկութեանը: Դէ-Վիտտը զօրավար Նազարբեկեանին նշանակում է Բիթլիսի ջոկատի հրամանատար, հրամայելով պաշտպանել քաղաքը:

Ապրիլի 6ին Նազարբեկեանը, իր շտաբի պետը եւ սակրաւորական ծառայութեան սպան ուսումնասիրում են տեղանքը եւ որոշում՝ որտեղ պէտք է կառուցուեն պաշտպանական դիրքերը: Այս աշխատանքում ընդգրկւում են ինչպէս զինծառայողները, այնպէս էլ աշխատունակ բնակչութիւնը:

ՎԵՐՋԱԲԱՆ

Այս հատուածում աւարտում են զօրավար Նազարբեկեանի յուշերը: 1917 փետրուարեան յեղափոխութիւնից յետոյ, երբ

ռուսական ժամանակատր Կառավարությունը թողատրեց հայերին կազմել սեփական զինուած ստորաբաժանումներ եւ պայմաններ ստեղծեց փախստականներին Արեւմտեան Հայաստան վերադառնալու համար, Նազարբեկեանը նոր եռանդով ձեռնամուխ եղաւ հայկական զինուորական կազմաւորումների ձեւաւորմանը: Յաւրթ, 1917 հոկտեմբերեան յեղաշրջումից յետոյ, երբ Կովկասեան Բանակը սկսեց զանգուածաբար լքել ռուս-թուրքական ռազմաճակատը, հայկական ուժերը բաւարար չէին ռազմաճակատը պաշտպանելու համար: 1918 Փետրուարին օսմանեան բանակն անցնում է յարձակման: Նոր կազմաւորուած հայկական զինուժը հարկադրուած էր նահանջել: Նոյնիսկ նման պայմաններում հնարաւոր եղաւ հակահարուած տալ ոսոխին: 1918 մայիսեան հերոսամարտերի ընթացքում հայկական բանակը եւ աշխարհագորային ստորաբաժանումները կարողացան հայութեանը փրկել վերջնական կործանումից, ջախջախելով թուրքերին Սարդարապատի եւ Բաշ Ապարանի ճակատամարտերում: Այդ յաղթանակներում իր լուսնն ունի զօրավար Թովմաս Նազարբեկեանը: Ճակատամարտերի բոլորում հռչակուեց Հայաստանի առաջին Հանրապետութիւնը, որի զինուած ուժերի կայացման ակունքներում, ի թիւս այլոց, կանգնած էր Նազարբեկեանը:

1919 Մարտի 25ին Նազարբեկեանը հանդիսացել է ՀՀ Զինուորական Խորհրդի նախագահ, իսկ Յուլիսի 15ին շնորհուել է զօրավար-տեղակալի կոչում:

1991ին Հայաստանի Հանրապետութեան հռչակումից յետոյ կառավարութիւնը քայլեր կատարեց վերականգնելու խորհրդային տարիներին անհարկի մոռացուած շատ անուններ, որոնց թում էր Նազարբեկեանը: ՀՀ Պաշտպանութեան Նախարարութիւնը նրա անունով սահմանեց մեդալ, իսկ Երեւանի թաղամասերից մէկը կոչուեց Նազարբեկեանի անունով:

ԾԱՆՕԹԱԳՐՈՒԹԻՒՆՆԵՐ

¹ Ըստ պաշտօնական տեղեկանքի՝ մահացել է 1931 Փետրուարի 17ին:

² ՀԱԱ, ֆ. 45, ց. 1, գ. 28, թ. 50:

³ 1921 Յունուարի 14ին Երեւան է գալիս Համառոտաստանեան Արտակարգ Յանձնաժողովի եւ ժԱ. Կարմիր Բանակի Յատուկ Բաժնի ներկայացուցիչ Գէորգ Աթարբեկովը (Աթարբեկեան): 1920 Յունուարի 20ին նրա պնդմամբ կազմում է նախկին ՀՀ բանակի հայ եւ ռուս սպաների անուանացանկը: Յունուարի 24ին սպաները՝ աւելի քան հազար հոգի, որոնց թում զօրավար-տեղակալներ Նազարբեկեանը, Սիլիկեանը, զօրավար-հազարապետ Պօղոս Բէկ-Փիրումեանը եւ ուրիշներ ձերբակալում եւ աքսորում են: Սպաներին հարկադրում են ոտքով Երեւանից հասնել Դիլիջան, որտեղից նրանց գնացցով տեղափոխում Բաքու: Նրանցից 500 հոգու ուղարկում են Ռիազանի համակենտրոնացման ճամբարը (Վլադիմիր Ն. Ղազախեցեան, *Հայաստանը 1920-1940 թթ.*, Երեւան, Հրատ., 2006, էջ 34-36. նաեւ՝ Կ. Յարութիւնեան, *Հայկական Ազգային Զօրամիատրումները 1918-1945 (Թուականներին, Երեւան, Հրատ., 2002, էջ 89-92):* Զօրավար Նազարբեկեանին սկզբնապէս տեղափոխում են Մոսկոյա՝ տխրահռչակ Բոստիրեան Բանտը, որտեղ նրա առողջութիւնն աւելի է վատանում: Այստեղից նրան եւ միջանի սպաների ուղարկում են Ռիազան (աւելի մանրամասն տե՛ս՝ G. A. Martirosian, *Ofitseri Respubliki Armeniya V Kontslagere Goroda Ryazani*, Ryazan, 2002 [Հայաստանի Հանրապետութեան սպաները Ռիազան քաղաքի համակենտրոնացման ճամբարում] http://stopgulag.org/object/8352602_5?lc=ru . նաեւ՝ A. A. Grigorova, A. I. Grigorova, *Zakliuchennnie Ryazanskogo Kontslageria RSFSR 1919-1923 Godov* (ՌԽՖՍՀ Ռիազանի նահանգային համակենտրոնացման ճամբարի քանտարկեալները 1919-1923), Ryazan, 2013 http://genroge.ru/riazanskij_konclager_1919-1923/index.htm: Աքսորավայրից վերադառնալուց յետոյ զօրավարը հաստատում է Թիֆլիսում: Նա իր գոյութիւնը որոշ ժամանակ պահպանում է Մերձաւոր Արեւելքի Ամերիկեան Կոմիտէի /American Committee for Relief in the Near East/ կողմից տրուող մթերքի հաշուին, սակայն 1929ի վերջին, երբ Կոմիտէն փակւում է, Նազարբեկեանը յայտնւում է ծայրայեղ աղքատութեան մէջ եւ նոյնիսկ մտածում է ինքնասպանութեան մասին: Քանի որ նա դրամ չունէր, որպէսզի վճարէր բնակվարձը, նրան սպառնում էին դուրս հանել քնակարանից (ՀԱԱ, ֆոնդ 45, ցուցակ 1, գործ 45, թերթ 1): Այնուամենայնիւ զօրավարն իր մէջ ուժ է գտնում, որպէսզի թղթին յանձնի Ա. Համաշխարհային Պատերազմի ռուս-թուրքական ռազմաճակատում իր մղած մարտական գործողութիւնների պատմութիւնը:

⁴ ՀԱԱ, ֆ. 45, ց. 1, գ. 41, թ. 13:

⁵ 1930 Դեկտեմբերի 23ին Հ. Հախվերդեանը ձերբակալւում է Լենինգրադում խորհրդային անվտանգութեան մարմինների կողմից յօրինուած ամբաստանութեան հիման վրայ՝ իբր անդամակցել է միապետական գաղտնի կազմակերպութեանը, որի նպատակն էր տապալել խորհրդային իշխանութիւնը: 1931 Ապրիլի 28ին գնդակահարուել է: 1989 Հոկտեմբերի 20ին յետմահու արդարացուել է:

⁶ Խորհրդային իշխանութիւնների կողմից Սիլիկեանը քանտարկուել է չորս անգամ: Բոլոր դէպքերում էլ ներկայացուել են անհեթեթ ու կեղծ

մեղադրանքներ: Գնդակահարուել է 1937 Նոյեմբերի 22ին: Յետմահու արդարացուել է 1987 Նոյեմբերի 10ին (մանրամասն տե՛ս՝ Ռ. Սահակեան, «Գեներալ-լեյտենանտ Մովսէս Սիլիկեան (Կենսագրութեան Անյայտ էջեր)», *Պարմաբանասիրական Հանդէս*, 2012, № 2, էջ 63-74. Նաե՛լ՝ M. L. Karapetyan, "General-Leytenant Movses Silikian (K 150-letio So Dnya Rojdeniya)" (*Զորավար-տեղակալ Մովսէս Սիլիկեան (ծննդեան 150ամեակի առթիւ)*), *Լրաբեր Հասարակական Գիտութիւնների*, 2012, թիւ 4, էջ 291-294):

⁷ Ռուսաստանցի պատմաբան եւ լրագրող Կոնստանտին Զալեսկին կազմելով Ա. Համաշխարհային Պատերազմի մասնակից զորավարների կենսագրականները, զորավար Նազարբեկեանի կենսագրութիւնում հարկ է համարել յիշատակել, որ 1915 Յուլիսի 9ի (22ին) թուրքական յարձակման ժամանակ զորավարը չի ցուցաբերել նախաձեռնութիւն եւ որեւէ կերպ չի աջակցել Կովկասեան Դ. Բանակային Կորպուսին եփրատեան Գործողութեան ժամանակ: Եւ դա պատճառ է հանդիսացել, որ թուրքական խմբաւորումը չոչնչացոյի: Սակայն, միաժամանակ Զալեսկին նշում է, որ Նազարբեկեանը պարգեատրուել է Ա. Գէորգիի Դ. Աստիճանի Շքանշանով, բայց չպարգաբանելով, թէ այդ ինչ գործողութեան համար է պարգեատրուել «նախաձեռնութիւն» չցուցաբերած զորավարը (K. A. Zaleskiy, *Pervaya Mirovaya Voina. Biograficheskiy Slovar'* Ա. Համաշխարհային Պատերազմ. կենսագրական բառարան, Մոսկուա, 2000, էջ 160): Կովկասի փոխարքայ եւ Կովկասեան Բանակի գլխաւոր հրամանատար, զորավար Բ. Վորոնցով-Դաշկովը, բազմաթիւ սպաների թում, միայն Նազարբեկեանին, Դիմանի նշանաւոր ճակատամարտում տարած յաղթանակի համար, պարգեատրուել է ոչ միայն ռուսական Ա. Գէորգիի Դ. Աստիճանի Շքանշանով, այլեւ ֆրանսիական «Մարտական Խաչ» (Médaille Militaire) մեդալով, որով պարգեատրուել էր ռուսական բանակի գերագոյն գլխաւոր հրամանատար, զորավար Նիկոլայ Ռոմանովը (կրտսեր):

⁸ ՀԱԱ, ֆ. 45, ց. 1, գ. 22, թ. 9:

⁹ Աւելի մանրամասն տե՛ս՝ Ռ. Սահակեան, «Ռուբէն Աւագ Քահանայ Բեկզուլեանցի Նամակները Արեւմտեան Հայաստանում Ռուսական Իշխանութիւնների Քաղաքականութեան Մասին», *Լրաբեր Հասարակական Գիտութիւնների*, 2009, № 3, էջ 297-301:

¹⁰ Մեր օրերում էլ անբարեխիղճ պատմաբանների կողմից, ինչպէս օրինակ Ռ. Սաֆարովը, օգտագործում են նման «հաստի» տեղեկութիւններ եւ ռուսական բանակում ծառայող հայերին ու կամաւորներին մեղադրում, որ նրանց 1915-1918 իբր 1,19 միլիոն մահմեդականներ են կոտորել: Իր հերթին նա համանման ամբաստանութիւն է ներկայացնում ռուսներին, որոնց իբր Բաթումի Նահանգում 1915ին ոչնչացրել են 88 հազար մահմեդական (R. Safarov, Uchastie Narodov Kavkaza V Pervoy Mirovoy Voiny՝ Կովկասի ժողովուրդների մասնակցութիւնը Ա. Համաշխարհային Պատերազմին) <http://www.kavkazoved.info /news/2015/02/07/uchastie-narodov-kavkaza-v-pervoy-mirovoj-vojne.html>: Նշենք, որ 1914ի աշնանը օսմանեան բանակը եւ «Թեքքի-

լաթը մահուսւէ» տխրահոգակ կազմակերպութիւնը Բաթումի Նահանգում, ինչպէս նաեւ Կարսի Մարզում իրականացրել են հայերի զանգուածային սպանութիւններ (Ռ. Սահակեան, «Փաստաթղթեր Առաջին Աշխարհամարտի Տարիներին Ռուսահպատակ Հայերի Զանգուածային Կոտորածների Մասին», *Լրաբեր Հասարակական Գիտութիւնների*, 2012, № 4, էջ 256-276. նաեւ նոյնի՝ «Բաթումի Նահանգի Հայութեան Կողոպտումն Ու Սպանութիւնները Ա. Համաշխարհայինի Սկզբում՝ 1914ի Աշնանը (Փաստաթղթեր)», *Հայկազեան Հայագիտական Հանդէս, Հայրոր ԼԳ., Պէյրութ*, 2013, էջ 7-45:

¹¹ "Armyanskiy Korpus Protiv Turetskikh Voysk (Noyabr 1917 G.-Yul 1918 G. Vospominaniya Generala F. I. Nazarbekova,» (Հայկական զորամասը թուրքական զօրքերի դէմ (1917 Նոյեմբեր-1918 Յուլիս) *Բանբեր Հայաստանի Արխիւների*, 1992, N 3, էջ 34-153:

¹² ՀԱԱ, ֆ. 45, ց. 1, գ. 1, թ.

¹³ Տե՛ս՝ E. V. Maslovskiy, "Mirovaya Voyna Na Kavkazskom Fronte 1914-1917 G." (Համաշխարհային պատերազմը կովկասեան ռազմաճակատում 1914-1917), *Strategicheskiiy Ocherk*, Փարիզ, 1933, էջ 32). նաեւ՝ *Istoriya Pervoy Mirovoy Voyni 1914-1918* (Առաջին համաշխարհային պատերազմի պատմութիւնը 1914-1917), *Հայրոր 1*, Մոսկուա, 1975, էջ 197:

¹⁴ ՀԱԱ, ֆ. 45, ց. 1, գ. 1, թ. 5-6: Տեղափոխուած զօրամասերի թում էր Էրիւանեան 13րդ *էյթ-գուարդիական* գունդը: Խորհրդային Միութեան մարաշխատ Բ. Մ. Շապոշնիկովի վկայութեամբ, Էրիւանեան Գունդը «ռուսական բանակի ամենահին գունդն էր, որը հիմնուել էր [ցար] Միխայիլ Ֆեոդորովիչ Ռոմանովի [1596-1645] օրօք, որի բանակատեղին Թիֆլիսի մօտ էր» (E. B. Shaposhnikov, *Voyenno-Istoricheskie Trudi* Ռազմագիտական երկեր, Մոսկուա, 1974, էջ 82):

¹⁵ S. M. Budyonnyy, *Projdenniy Put* (Անցած ուղին), Մոսկուա, 1959, էջ 12-13:

¹⁶ G. W. Pipya, *Germanskiy Imperializm V Zakavkazie V 1910-1918 GG.* (Գերման կայսերապաշտութիւնը Անդրկովկասում 1910-1918), Մոսկուա, 1978, էջ 50:

¹⁷ Անուանումը ստացել է՝ Իրանական Ատրպատականի աղաւաղում ձեռից: Ռուսական զօրամասերը յաճախ կոչում էին այն տեղանունների անուններով, որտեղ նրանք մղում էին մարտական գոծողութիւնները: Այսպէս օրինակ, զօրավար Նազարբեկեանի Կովկասեան Բ. Հետեւականի Դիւիզիան՝ Բիթլիսի, ապա Մուշի ջոկատ:

¹⁸ Զօրավարը յուշերում յաճախ է անդրադառնում Զարիեանին, բարձր է գնահատում նրա կատարած հսկայածառ աշխատանքները, որոնք նպատակ ունէին վերացնել Ա. Խմբում եղած թերութիւնները: Ա. Խումբը Նազարբեկեանի գնահատմամբ՝ Զարիեանի զաւակն էր (ՀԱԱ, ֆ. 45, ց. 1, գ. 1, թ. 15):

¹⁹ Կովկասեան Բանակի թիկունքի պետ Եւգենի Մասլովսկին իր ուսումնասիրութիւնում հետաքրքիր տեղեկութիւններ է հաղորդում վերը նշուած մասին: Պատերազմի նախօրեակին ԿՌՕի հետախուզութեան պետ է նշնակուում գլխաւոր շտաբի ակադեմիան աւարտած մի սպայ, որն իր սխալ

գործողությունների հետեանքով լուծարում է մինչ այդ ստեղծված գործակալական հզոր ցանցը, փոխարենը ոչինչ չստեղծելով (Maslowskii, էջ 47):

²⁰ ՀԱԱ, ֆ. 45, ց. 1, գ. 1, թ. 14-15 շրջ.:

²¹ Իրականում խմբերի թիվը վեցն էր: Ե. Խումբը Վարդանի (Սարգիս Մեհրաբեան) հրամանատարությամբ չմեկնեց ռազմաճակատ, քանի որ զենք չունէր: Մէկ խումբ, որը հիմնականում կազմուած էր հնչակեան կամատրներից, ձեատրուել էր Կարսում: Մարտական գործողություններին մասնակցելուց յետոյ, 1915 Յունուարին, լուծարուեց: Զորավարը սխալում է, նշելով, որ կամատրական ստորաբաժանումները ձեատրուել են հայերի առաջարկով. նախաձեռնողը եղել է Կովկասի փոխարքայ Վրոնցով-Դաշկովը:

²² ՀԱԱ, ֆ. 45, ց. 1, գ. 1, թ. 14 շրջ.-15:

²³ ՀԱԱ, ֆ. 45, ց. 1, գ. 1, թ. 5 շրջ.-6:

²⁴ ՀԱԱ, ֆ. 45, ց. 1, գ. 1, թ. 19 շրջ.:

²⁵ ՀԱԱ, ֆ. 45, ց. 1, գ. 1, թ. 26:

²⁶ ՀԱԱ, ֆ. 45, ց. 1, գ. 1, թ. 34:

²⁷ ՀԱԱ, ֆ. 45, ց. 1, գ. 1, թ. 36 շրջ.:

²⁸ ՀԱԱ, ֆ. 45, ց. 1, գ. 1, թ. 36:

²⁹ ՀԱԱ, ֆ. 45, ց. 1, գ. 1, թ. 40 շրջ.:

³⁰ ՀԱԱ, ֆ. 45, ց. 1, գ. 1, թ. 47 եւ շրջ.:

³¹ ՀԱԱ, ֆ. 45, ց. 1, գ. 1, թ. 47 շրջ.:

³² Նազարբեկեանը տեղեկանում է զորավար Չեռնոզուբովից, որ վերջինս Զաւրիեանի օգնությամբ սովորում է հայերէն, քանի որ նախատեսւում է իրեն՝ Չեռնոզուբովին նշանակել Արեւմտեան Հայաստանի զորավար-նահանգապետ: Նազարբեկեանը թերահաատօրէն է վերաբերում զորավարին այդ պաշտօնին նշանակելուն, քանի որ շատերն էին յաւակնում դառնալ զորավար-նահանգապետ (ՀԱԱ, ֆ. 45, ց. 1, գ. 2, թ. 12): Վկայակոչուած փաստը կրկին ու կրկին է հաւաստում, որ Ռուսական Կայսրութիւնը որեւէ նպատակ չունէր Արեւմտեան Հայաստանին ինքնավարութիւն շնորհել:

³³ ՀԱԱ, ֆ. 45, ց. 1, գ. , թ. :

³⁴ N. Korsun, *Alashkertskaia I Khamadanskaia Operatsii Na Kavkazskom Fronte Mirovoy Voiny* (Ալաշկերտեան եւ համադանեան գործողութիւնները կովկասեան ռազմաճակատում) Մոսկուա, 1940, էջ 154. նաեւ՝ ՀԱԱ, ֆ. 45, ց. 1, գ. 2, թ. 43 եւ շրջ.:

³⁵ Maslowskii, էջ 156:

³⁶ Korsun, էջ 42:

³⁷ ՀԱԱ, ֆ. 45, ց. 1, գ. , թ. 33 շրջ.:

³⁸ ՀԱԱ, ֆ. 45, ց. , 1գ. , թ. 28:

³⁹ ՀԱԱ, ֆ. 45, ց. 1, գ. , թ. 28 շրջ.:

⁴⁰ ՀԱԱ, ֆ. 45, ց. 1, գ. 2 թ. 34 շրջ.:

- ⁴¹ ՀԱԱ, ֆ. 45, ց. 1, գ. 2, թ. 32 շրջ.: Նազարբեկեանն այն կարծիքի էր, որ Ադրբեջանական Ջոկատում թուրքերն ունէին իրենց լրտեսը, որն ամենայն մանրամասնութեամբ տեղեկացնում էր ռուսական ուժերի տեղաշարժի եւ թուաքանակի մասին (ՀԱԱ, ֆ. 45, ց. 1, գ. 2, թ. 32 շրջ.):
- ⁴² *Զորավար Անդրանիկի Կովկասեան Ճակատի Պատմական Օրագրութիւնը, 1914-1917. Օրագրուած Զորավարին Թիֆլսապահ Զինուորէն, Երեւան, ԵՊՀ Հրատ., 2000, էջ 18:*
- ⁴³ ՀԱԱ, ֆ. 45, ց. 1, գ. 2, թ. 37 շրջ.:
- ⁴⁴ *“Andranik Ozanian. Dokumenti i Materiali (Անդրանիկ Օզանեան. փաստաթղթեր եւ նիւթեր)”, Բանքեր Հայաստանի Արխիւների, 1990, էջ 166):*
- ⁴⁵ ՀԱԱ, ֆ. 45, ց. 1, գ. 2, թ. 42 եւ շրջ.:
- ⁴⁶ Մուրատ Կարապետեան, *Հայկական Կամաւորական Խմբերը եւ Ազգային Գումարդակները Կովկասեան Ռազմաճակատում (1914-1917 թթ.)*, Երեւան, ՀՀ ԳԱԱ «Գիտութիւն» Հրատ., 1999, էջ 80-81:
- ⁴⁷ ՀԱԱ, ֆ. 45, ց. 1, գ. 2, թ. 51, 54:
- ⁴⁸ ՀԱԱ, ֆ. 45, ց. 1, գ. 2, թ. 49 եւ շրջ.:
- ⁴⁹ ՀԱԱ, ֆ. 45, ց. 1, գ. 2, թ. 58 շրջ.:
- ⁵⁰ ՀԱԱ, ֆ. 45, ց. 1, գ. 3, թ. 4:
- ⁵¹ ՀԱԱ, ֆ. 45, ց. 1, գ. 3, թ. 6:
- ⁵² ՀԱԱ, ֆ. 45, ց. 1, գ. 3, թ. 7 եւ շրջ.:
- ⁵³ ՀԱԱ, ֆ. 45, ց. 1, գ. 3, թ. 12-13 շրջ.:
- ⁵⁴ ՀԱԱ, ֆ. 45, ց. 1, գ. 3, թ. 16:
- ⁵⁵ ԺԺ. դարում Ռուսաստանը պայքար էր մղում Հիւսիսային Կովկասում ամրապնդուելու համար: Լեռնականները կատաղի դիմադրութիւն են ցոյց տալիս ռուսական զօրքերին: 1859ին ռուսներին յաջողում է հասնել յաղթանակի եւ զգալի թուով մահմեդական լեռնականներ հեռանում են Օսմանեան Կայսրութիւն: Նրանք՝ աղքդներ, չեջէներ, կաթարդիներ եւ այլ ժողովուրդներ յայտնի էին չերքեզ հաաքական անունով:
- ⁵⁶ ՀԱԱ, ֆ. 45, ց. 1, գ. 3, թ. 21:
- ⁵⁷ Իւան Օբրագով (1859-1938), ռուս զինուորական, գնդապետ, 1917ից՝ զօրավար:
- ⁵⁸ Կոտորակառումը:
- ⁵⁹ ՀԱԱ, ֆ. 45, ց. 1, գ. 3, թ. 25 շրջ.:
- ⁶⁰ Կազակային հետեակ ստորաբաժանում: Հիմնականում օգտագործուել են հետախուզական գործողութիւնների համար:
- ⁶¹ Միխայիլ Զինկեպիչ (1883-1945), Ա. Աշխարհամարտի մասնակից, գնդապետ: Հակաբոլշեւիկեան Սպիտակ Շարժման մասնակից: Բ. Համաշխարհային Պատերազմի տարիներին գործակցել է գերմանացիների հետ: Սպանուել է հարաւալաացի պարտիզանների դէմ մղած մարտերից մէկում:
- ⁶² Զինուորական կոչում կազակային զօրքերում, որը հաւասարագօր էր փոխգնդապետի կոչման:

- ⁶³ Պիոտր Աբաշկին (1868-1934), ռուս գինուորական, կազակ, զորավար-հազարապետ:
- ⁶⁴ ՀԱԱ, ֆ. 45, ց. 1, գ. 3, թ. 33 շրջ.:
- ⁶⁵ ՀԱԱ, ֆ. 45, ց. 1, գ. 3, թ. 34:
- ⁶⁶ Կլաաս-Գուստա-Ռոբերտ Շարպանտիե (1858-1918), ռուսական բանակի զորավար, Կովկասեան Կազակային Դիվիզիայի հրամանատար:
- ⁶⁷ ՀԱԱ, ֆ. 45, ց. 1, գ. 3, թ. 38-39:
- ⁶⁸ ՀԱԱ, ֆ. 45, ց. 1, գ. 3, թ. 44:
- ⁶⁹ ՀԱԱ, ֆ. 45, ց. 1, գ. 3, թ. 47 շրջ.:
- ⁷⁰ Ալեքսանդր Նոսկով (1870-?), ռուս գինուորական, կազակ, գնդապետ, Լաբինսկեան Ա. Կազակային Գնդի հրամանատար: Նազարբեկեանն իր յուշերում կարեւոր փաստ է հաղորդում այդ «գերակշիռ» ուժերի մասին: Նա գրում է. «Ջուկատի շտաբ կապի համար գործուղուել էր Լաբինսկեան Կազակային Գնդի խորունժի (ազգանունը չեմ յիշում): Նա յետագայում իմ շտաբի սպաներին պատմել է, երբ Մուշի դաշտից [1915] Յուլիսի 9ին Լաբինսկեան Գնդի հրամանատարն ինձ համար զեկուցագիր էր պատրաստում՝ դիմեց սպաներին եւ ասաց, որ պէտք է հարկադրել զօրավար Ֆ. Նազարբեկովին նահանջել: Հարցրեց, թէ որքան թոչուն կայ ծաղի վրայ: Ինչ որ մէկը հաշուեց եւ ասաց՝ 12: Դէ այդպէս էլ զեկուցեք, որ Մշոյ դաշտից յարձակում են 12 թաւուրներ (գումարտակներ - Ռ. Ս.)» (ՀԱԱ, ֆ. 45, ց. 1, գ. 3, թ. 48 շրջ.-49):
- ⁷¹ ՀԱԱ, ֆ. 45, ց. 1, գ. 4, թ. :
- ⁷² ՀԱԱ, ֆ. 45, ց. 1, գ. 3, թ. 47 շրջ.:
- ⁷³ ՀԱԱ, ֆ. 45, ց. 1, գ. 5, թ. 12:
- ⁷⁴ ՀԱԱ, ֆ. 45, ց. 1, գ. 5, թ. 25: Բերկրիի Կիրճում վասպուրականցի փախստականները ենթարկում են քրդական աազակախմբերի յարձակմանը: Չունենալով անհրաժեշտ թուով պաշտպանութիւն, հայերն ունենում են զգալի կորուստներ: Ամերիկացի միսիոներների վկայութեամբ շատերն ինքնասպանութիւն էին գործում, իսկ մայրերը երեխաների հետ նետում էին կիրճով անցնող վարարած գետը, որպէսզի քրդերի ձեռքը չընկնեն: 1916ին Վան վերադարձող ամերիկացի միսիոներները հաշուել էին այս ու այն կողմ ընկած կմախքները, որոնց մօտաւոր թիւը կազմել է եօթ հազարից ւաւելի (C. D. Ussher, G.H. Knapp, *An American Physician in Turkey. Narratives of Adventures in Peace and War*, New York, Boston, 1917, Houghton Mifflin Company, էջ 311:
- ⁷⁵ Ասագ սպայական կոչում հեծելագործում:
- ⁷⁶ Նիկողայ Բարաթով (Բարաթաշվիլի, 1865-1947), ռուս գինուորական, Կովկասեան Ա Կազակային Դիվիզիայի հրամանատար:
- ⁷⁷ ՀԱԱ, ֆ. 45, ց. 1, գ. 6, թ. 3: Աւելի մանրամասն տե՛ս՝ Ռ. Սահակեան, *Արեւմտեան Հայաստանի Ռազմաքաղաքական եւ Վարչադրոշմական Իրավիճակը (1914 թ. Յուլիս-1917 թ. Փետրուար)*, Երեւան, ՀՀԳԱԱ, Գիտութիւն Հրատ., 2015, էջ 215-254:

- ⁷⁸ ՀԱԱ, ֆ. 45, ց. 1, գ. 6, թ. 4 շրջ.-5: Մեդալի անուանումն է՝ “Médaille Militaire”. սահմանուել է 1852ին: Իր նշանակութեամբ մեդալը զինուում է միայն «Պատուոյ Լեգէոն» շքանշանին:
- ⁷⁹ Նազարբեկեանը զօրավար-տեղակալի կոչմանն է արժանանում միայն Հայաստանի Հանրապետութիւնում:
- ⁸⁰ ՀԱԱ, ֆ. 45, ց. 1, գ. 6, թ. 23:
- ⁸¹ ՀԱԱ, ֆ. 45, ց. 1, գ. 6, թ. 20 շրջ.-21:
- ⁸² Ռուբէն Բեկզուեանց (1875-1935), առաջ քահանայ:
- ⁸³ ՀԱԱ, ֆ. 45, ց. 1, գ. 7, թ. 23: Նազարբեկեանի զօրամաս էին ժամանել Ն. Ռոմանովի կողմից ուղարկուած երկու անձեր, որոնցից մէկը Դամասկոսում ռուսական նախկին հիւպատոս իշխան Շախովսկին էր: Նրանց յանձնարարուած էր բանակցել ըստ ցեղապետ Քեամիլ բէյի հետ, վերջինիս ղեկի ռուսները կողմնորոշելու համար (ՀԱԱ, ֆ. 45, ց. 1, գ. 11, թ. 35 շրջ.):
- ⁸⁴ ՀԱԱ, ֆ. 45, ց. 1, գ. 10, թ. 7 շրջ.-8:
- ⁸⁵ ՀԱԱ, ֆ. 45, ց. 1, գ. 10, թ. 30:
- ⁸⁶ ՀԱԱ, ֆ. 45, ց. 1, գ. 10, թ. 15 շրջ.:
- ⁸⁷ ՀԱԱ, ֆ. 45, ց. 1, գ. 10, թ. 17 շրջ.-18:
- ⁸⁸ ՀԱԱ, ֆ. 45, ց. 1, գ. 10, թ. 20 շրջ.-21: Շտաբս-կապիտանի զեկուցագիրն առաջին անգամ հրատարակուել է ակադեմիկոս Մ. Ներսիսեանի կողմից (*Հայերի Ցեղասպանութիւնը Օսմանեան Կայսրութիւնում. Փաստաթղթերի եւ Նիւթերի Ժողովածու*, կազմ.՝ Մ. Գ. Ներսիսեան, Ռ. Գ. Սահակեան, խմբ.՝ Մ. Գ. Ներսիսեան, Երեւան, Հայաստան Հրատ., 1991, էջ 501-504): Կրիմ-Շամխայի զեկուցագրի պատճէն գտնուել է ՀՀ ԳԱԱ Պատմութեան Ինստիտուտի Լէոյի անձնական արխիւում (ֆ. 1, ց. 1, գ. 226, թ. 1-6): ՀԱԱում մեզ յաջողուեց գտնել շտաբս-կապիտանի զեկուցագրի քնագիրը Նազարբեկեանի արխիւում, որը հրատարակուեց ամբողջութեամբ (Ռ. Սահակեան, «Աշոտ Աթանասեանի Գործունէութիւնը Արեւմտեան Հայաստանի Վերաշինութեան Գործում», *Բանբեր Հայաստանի Արխիւների*, 2007, N 1-2, էջ 37-54): Մեզ յաջողուեց որոշ տեղեկութիւններ յայտնաբերել Միխայիլ Կրիմ-Շամխալովի (Սոկոլով) անձի մասին: 1918 Ապրիլին փոխգնդապետ Կրիմ-Շամխալովը հանդիսացել է Հայկական զօրամասի հետախուզական բաժնի պետը: Մայիսի 12ին օպերատիւ տուեալներ են ստացուել Ալեքսանդրապոլի վրայ թուրքերի հնարաւոր յարձակման մասին: Այդ մասին զեկուցում է Կրիմ-Շամխալովին, որը վճռականորէն հերքում է ստացուած տեղեկութիւնը: Աւելին, Մայիսի 15ին թուրքերի կողմից Ալեքսանդրապոլ ներխուժելուց առաջ փոխգնդապետը հրաժարում է հեռանալ՝ պատճառաբանելով, որ կինը հիւանդ է (ՀԱԱ, ֆ. 45, ց. 1, գ. 28, թ. 101): Նշուածը ենթադրել է տալիս, որ Կրիմ-Շամխալովը կա՛մ եղել է թաքնուած թշնամի, որին փնտրում էր ռուսական հակահետախուզութիւնը դեռեւս 1915ին, կա՛մ որոշել էր անցնել թուրքերի կողմը: Խորհրդային Միութեան մարաքայտ Ս. Բուդիոննին իր յուշերում հետաքրքիր տեղեկութիւններ է հաղորդում Կրիմ-Շամխալովի մասին: Վերջինս եղել է կարարդիւնեան, ըստ այլ տեղեկութեան՝ կարաջայ իշխան, որը

ընդունել է ուղղափառություն: Նրա մասին որպես մարդ և սպայ Բուդյոննին բացասական կարծիք է յայտնում: Վերջինս կարգապահական խախտման համար Կրիմ-Շամխալովի կողմից ներկայացունել էր ռազմա-դաշտային դատարանին, որը վճռել էր մահապատժի ենթարկել: Սակայն դատավճիռը փոխուել էր. ապագայ մարաջախտին զրկել էին Գեորգիենեան Դ. Աստիճանի Մեդալից (Budyonniy, էջ 13, 16, 21):

⁸⁹ ՀԱԱ, ֆ. 45, ց. 1, գ. 10, թ. 35 շրջ.:

⁹⁰ ՀԱԱ, ֆ. 45, ց. 1, գ. 11, թ. 19 և շրջ.:

⁹¹ ՀԱԱ, ֆ. 45, ց. 1, գ. 11, թ. 20:

⁹² ՀԱԱ, ֆ. 45, ց. 1, գ. 12, թ. 19 և շրջ.:

⁹³ ՀԱԱ, ֆ. 45, ց. 1, գ. 12, թ. 23:

⁹⁴ ՀԱԱ, ֆ. 45, ց. 1, գ. 12, թ. 24:

GENERAL THOMAS NAZARPEGIAN'S UNPUBLISHED MEMOIRS ON THE
MILITARY OPERATIONS OF THE RUSSO-TURKISH (CAUCASIAN) BATTLEFRONT
DURING WWI (1914 JULY-1916 APRIL)

(Summary)

Ruben Sahakian

rubensahakyan58@gmail.com

General Thovmas Nazerpegian (Ivan Nazarpegov, 1855-1931) is one of the few Armenian military figures who participated in a series of famous wars, like the Russian-Turkish war of 1877-1878, the Russian-Japanese war of 1904-1905, Russian-Turkish battles in WWI (1914-1917), the February-June 1918 Armenian-Turkish war, the February 1918 Armenian-Georgian war, the 1919-1920 Armenian-Azeri fights and finally in the 1920 Armenian-Turkish clashes.

His military achievements during the 1917-1920 battles are well established. The article, for the first time, illustrates the general's battle record during 1914-1916 on the Caucasian front, where he played a key role in the WWI Turkish-Russian battles.

Thanks to his military and strategic efforts, the Russian Imperial army scored a decisive victory in Northern Persia, near Tilman, which hindered the advance of the Ottoman army towards the Caucasus.

The Memoirs illuminate and clarify a number of controversial issues related to this capable General's war legacy.